




TIN (Timor-Indonesia)



Tinan XIV Mensal  
1-3 Jan/Mar  
Tama To'o Libun 2017

GIA ESPIRITUÁL IHA DALAN  
KSOLOK NO GLÓRIA NIAN

# KONTEÚDU JAN-MAR 2017

## 3 Editoriál

## 3 Husi Provinsiál

## 5 Halo buat ne'ebé Nia dehan

6 Maromak akompaña nia povu sai husi rai moris-atan nian

## 11 Fila fali ba abut

12 Santa Teresa d'Avila: gia espirituál iha dalan ksolok no glória nian

21 Fuan ororianu

23 Surat husi Reitór-Mor ba foin-sa'e sira

## 24 Tatoli Fiar

25 Fiar, dixernimentu, vokasaun

30 Liturjia eukarístika no práтика sira hala'o iha ita-nia Rain

## 36 Lidun moris konsagrada

37 Iha fidelidade ba karizma, hanoin hikas ekonomia

40 Integrasaun religioza personalidade nian

## 42 Tama kle'an bá

43 Fiar nu'udar rekursu ba umanizasaun relasaun dijital

4 Film Forever strong



**Responsavel FMA TATOLI:**  
Ámbitu Komunikasaun Sosial  
PROVINSIA TIN  
Dili, Timor-Leste

## Editorial: Akompañamentu pesoál: instrumentu ba dixernimentu

Dixernimentu mak liafuan klásiku ida tradisaun Igreja nian. Eziste dixernimentu sinál sira tempu nian, ne'ebé haka'as an iha rekoñesimentu kona-ba Espíritu nia presenza no asaun iha istória; dixernimentu morál, ne'ebé distinge buat di'ak husi buat aat; dixernimentu espirituál, ne'ebé propoin atu rekoñese tentasaun atu rejeita no, iha contráriu, bá oin iha dalan plenitude moris nian. Espíritu ko'alía no atua liuhusi akontesmentu sira iha ema ida-idak nia moris, maibé eventu sira mumun (ko'alía-laek) no ambíguu, basá ema bele interpreta iha modu lahanesan. Leno ninia signifikadu atu to'o ba desizaun ida eziye perkursu ida dixernimentu nian. Verbu tolu ne'ebé Evangelli: Gaudium, 52 uza atu deskreve dixernimentu – rekoñese, interpreta, hili – bele tulun ita; delineia itineráriu adekuadu ida ba indivíduo; nune'e mós ba grupu sira no komunidade sira.

Atu bele deside presiza iha instrumentu sira atu rekoñese Na'i nia bolun ba ksolok domin nian no deside fó resposta ida ba nia.

Entre instrumentu sira, tradisaun espirituál tau iha evidénsia importánsia **akompañamentu pesoál**. Atu akompaña ema seluk la'ós suficiente estuda teoria dixernimentu nian; presiza moris iha kulit rasik esperiencia atu interpreta movimento sira fuan nian; atu iha sira rekoñese Espíritu nia asaun, ne'ebé nia lian hatene ko'alía ba ema ida-idak. Akompañamentu pesoál husu atu halo kro'at nafatin sensibilidade rasik ba Espíritu nia lian, hodi lori atu deskobre iha partularidade pesoál sira rekursu ida no rikusoin ida.

Maromak rasik iha istória salvasaun nian hatudu oinsá akompaña, nune'e mós ita-nia fonte saleziana sira fó exemplu oioin.

Mai ita aprende! \*\*\*

## Husi Provinsiál

*Irmán, leigu no foin-sa'e doben sira,*



Ita sei moris iha período ida ne'ebé Kreda bolu “tempu forte”, tanba iha importánsia boot ba ita-nia fiar nu'udar sarani. Tempu Kuarezmál no Paskál halo ita hakle'an Maromak nia domin ba ita ida-idak no nia planu salvasaun nian ne'ebé la husik maski Ninia Oan doben tenke liu husi mate.

Buat ne'e halo ha'u hanoin ba istória ida ne'ebé ha'u rona iha oratório bainhira ha'u sei ki'ik. Iha foin-sa'e ida ne'ebé la'o daudaun besik foho ki'ik bainhira nia rona ema ida repete: “Hatum ha'u husi ne'e... hasae ha'u husi ne'e”. nia komesa la'o tuir lian ida ne'e, to'o bainhira nia haree katak iha foho tutun iha krús ida, no mane-klosan ida ne'ebé prega iha krús repete liafuan hirak ne'e. Nia hakfodak no husi dook nia haree kedes katak krús ne'e aas, nune'e nia halai buka eskada ida atu bele to'o mane-klosan ne'e nia liman. Maibé, iha fatin ida ne'ebá la iha uma ida, nune'e nia presiza la'o dook, buka uma. Bainhira hetan uma, ho eskada ida ne'ebé todan liu, nia ba fali to'o krús hun, hodi hateke ba mane-klosan no dehan: “Keta preokupa, minutu ruma tan ha'u sei hatún ó husi ne'ebá”, maibé, mane-klosan hatán ba nia: “Lae, lae, ha'u sei prega iha krús ida ne'e to'o bainhira ha'u-nia alin ida iha mundu hetan terus ka injustisa. Ó ba tulun sira, liberta sira: iha momentu hanesan ha'u sei tun husi krús!”

Iha tempu Kuarezma nian ita aprende atu


tuir Jezús nia ain fatin liuhusi orasaun no jejún, maibé liuhusi karidade, ita aprende atu hadomi Nia iha ema ida-idak, liuliu ki'ik sira, ne'ebé ita hasoru. Loron 12 marsu, iha Angelus, Amu-Papa Francisco fó hanoin katak: "Iha tempu Kuarezma nian ne'e, ita kontempla ho devosaun ilas krusifksu nian, Jezús iha krús: ne'e mak símbolu fiar sarani nian, emblema Jezús nian, mate no moris-hi'as mai ita."

Iha livru ida kona-ba martir sira iha Japaun (foin daudaun halo film ida husi livru ida ne'e), iha pasajen ida kona-ba padre misionáriu ne'ebé hetan persegisaun: "Husi ki'ik kedas, Jezús nia Futar Oin sai ninia mehi no ideál, hanesan foin-sa'e ida hanoin ba ninia belun doben nia oin, iha momentu ne'ebé nia sente mesak, amlilik toman atu imajina Jezús nia Futar Oin: bainhira haklaken Rahun-Di'ak sira, Jezús nia Futar Oin bainhira Nia la'o iha Tasi Galilea leten. Iha momentu mós ne'ebé padre simu tortura todan, Futar Oin ida ne'e la lakon ninia furak. Ninia matan midar no moos, ne'ebé tama borus to'o laran, hateke metin ba nia ... Bainhira Futar Oin ida ne'e mosu iha ninia oin, ta'uk no nakdedar

lakon kedas  
no nia parese  
ko'alía: 'Bainhira ó terus,  
Ha'u terus ha-  
mutuk ho ó.  
Ha'u sei besik  
ó to'o rohan.'

Ha'u hanoin katak ida ne'e mak segredu ne'ebé halo ita-nia asaun pastorál, maibé

mós ita-nia servisu loron-loron nian, ita-nia moris iha família no komunidade, sai momentu salvasaun nian: hatene haree Jezús nia Futar Oin iha ema hotu ne'ebé ha'u hasoru, sente katak Nia bolu ha'u liuhusi ha'u nia maluk nia prezensa, liuliu se maluk ida ne'e mak ki'ik no kiak. Ida ne'e mak matan



fiar nian, matan ne'ebé hatene haree Jezús iha fatin hotu no mós hatene haree (rona, hanoin, ko'alía) hanesan Jezús. Maibé ita presiza treinu ita-nia matan, tanba iha momentu rumá, susar atu deskobre Jezús moris hi'as nia Futar Oin iha buat ne'ebé akontese.


Iha Angelus hanesan, iha momentu ne'ebé Amu-Papa kumpriimenta ema sira, nia dehan: "Ha'u reza mós no ha'u husu ba imi atu reza ba foin-sa'e fetu no mane sira ne'ebé sai vitima violénsia sira nian, tráfiku ema nian no esplorasaun sira, no vitima funu sira nian. Ida ne'e mak kanek, ida ne'e mak hakilar ne'ebé subar, maibé ita hotu tenke rona no ita labele kontinua finje katak ita la haree ka la sente tiha".

Apelu ida ne'e tenke sona borus ita-nia fuan, oinsá ita, ne'ebé hili Don Bosco no Madre Mazzarello nia dalan atu serví labarik no foin-sa'e sira, hatene haree no rona situasaun sira ne'e ne'ebé prezente mós iha ita-nia rai no iha ita-nia ambiente sira? Tinan ida ne'e Inspetoria lori ba ohin sensibilizasaun no reflesaun kona-ba política ba abuzu menordade nian no komunidade rumá, ne'ebé halo ona enkontru, hatudu entusiazmu no


hakarak atu tau at-  
ensaun partikulár  
ba aspetu ida ne'e.  
Ita tulun malu atu,  
ho ita-nia empeñu,  
ita bele halo Jezús  
moris-hi'as nia  
Futar Oin mosu iha  
situasaun terus nian  
no fó ksolok ba la-  
barik, foin-sa'e no  
adultu hotu ne'ebé  
espera iha moris ida  
ne'ebé iha valór.

**Festa kmanek Pásqua nian!**

**Ir. Alma Castagna**



Halo buat ne'ebe'  
nia dehan ba imi



LECTIO BA MORIS

Tatoli - Halo buat ne'ebeé Nia dehan

# MAROMAK AKOMPAÑA NIA POUU SAI HUSI RAI MORIS-ATAN NIAN

*Itineránsia, viajen ka halo dalam karakteriza figura bíblika boboot barak. Ida-ne'e mak elementu estruturál fiar nian. Nune'e, sei la iha esperiénsia fiar nian se la iha forma rumo halo dalam nian. Ida-ne'e mak ita haree mós iha realidade humana iha jerál: bainhira ita hasoru realidade (ema seluk, mundu, Maromak nian...)*

*nia interpela ita, bolu ita atu sai bá li'ur, dudu ita, tau ita iha movimentu.*

*Iha figura bíblika itineránsia foti ninia orientasaun desiziva liuhusi enkontru partikulár ho Maromak eh ho ninia mediadór/a. Enkontru desizivu iha Bíblia (vokasaun) baibain sempre akontese iha idade adulta no sempre implika «sai ba li'ur» no iha ne'e importante liu valór akompañadór/a nian eh mediadór nian.*



## Lectio kona-ba Moisés (Ex 3,1-10)

### Itineránsia

Maromak nia revelasaun iha istória Israel nian, no liuliu iha Jezús nia eventu no eskolante sira ninia ‘sequela’ eh tatuir, hatudu oinsá Na'i mós la'o rai, itinerante, iha movimentu hasoru ita no ho ita. Sai “pessoa”, ema ne'ebé eziste nu'udar relasaun, presupoim sai husi an rasik atu hasoru ema seluk. No ida-ne'e vale mai ita la'ós de'it tanba ita ema limitadu, maibé tanba ita mak Maromak nia «ilas». Nia mak uluk liu sai husi an rasik atu hasoru ita... bainhira nia bá buka Adão no eva ne'ebé subar an, bolu Abraão, hein Moisés iha ai-hun ne'ebé lakan, iha Jezús nia

eventu...

Sai husi saida? Iha eventu ézodu dehan «sai husi moris-atan», husi salan, husi ignoránsia Maromak nian no ema seluk nian...

### “Moisés: halo sai ba li'ur!”

Ema ne'ebé già povu sai husi moris-atan Ejitu nian mak mane ida ho inan rua no aman Ejitu nian.

### Ha'u mak Maromak ó-nia aman

Livru “Éxodo” fó ba Moisés aman ida no inan ida husi tribu Levi. Maibé nia lori naran rai Ejitu nian no nia mak “oan-hakiak” Faraó nia oan-feto nian ne'ebé salva nia husi bee

sira mota Nilo nian. Istória kona-ba Moisés nia moris ninia inísiu apresenta Moisés hanesan ema ida ne'ebé sobrevive tanba «inan sira» nia konspirasaun afavór ba vida iha «aman sira» nia hirus-boot hodi oho.

Inísiu Moisés nia moris mak figura antisipa-da povu ninia esperiênsia. Atu sai gia eh lidér ézodu ida nian bá to'o Na'i, Moisés tenke sai... espesialista. Salva husi bee no eduka iha Faraó nia kadunan, bainhira to'o idade adulta nia «sai», (“nia bá haree ninia maunalin sira”), nia sente hola-parté ba família no solidariedade ne'ebé dudu nia atu oho. No iha pontu ida-ne'e mak Moisés tenke eskapá atu salva nia an husi Faraó ne'ebé buka atu halo justisa ba nia: «nia hadook an husi Faraó nia oin», modu ida ne'ebé hanesan ho abandona ninia aman. Oan ne'ebé oho halai husi aman ninia kastigu mortál.

Nia hetan protesaun iha Madian no sai ema Madian nian. Nune'e, iha ne'ebé Maromak hasoru nia iha Horeb (Sinai) Moisés atra-versa mundu tolu: mundu Ejitu nian, mundu Ebreu (maibé liu lais de'it) no ida Madian nian, ida-ne'ebé nia atualmente soi: feen ida, oan-mane ida, banin-mane amlulik (Jetro); no mós, provalvelmente orientasaun ba Maromak ne'ebé hatudu An ba nia.

To'o iha Maromak nia foho. Ne'e mak Maromak nia foho maibé Moisés la hatene. Molok Moisés hasoru Maromak iha ahi-hun ne'ebé lakan, foho ne'e mak Maromak nia foho ba ema sira. Nune'e, Moisés mós mai depois, hola parte ba série ida, maski nia hahú filafali dala tolu no bele hanoin, hodi haluha ninia orijen, katak nia mak inísiu ida. Maromak apresenta an ba nia nu'udar «ó-nia aman nia Maromak, Abraão nia Maromak, Isaac nia Maromak, Jacob nia Maromak». Maromak revela an ba Moisés nu'udar hola parte ba família, ne'ebé koñese Moisés nia orijen maski molok ne'e nia nunka hasoru. Moisés nia aman naturál labele hala'o nia knaar atu hatutan liman-rohan fier nian ba nia oan-mane ida-ne'e. Aman sira ne'ebé Moisés iha to'o oras ne'e (menus Jetro) envezde kumpri sira-nia devér atu entrega liman-rohan fier nian ida-ne'e ba oan-mane ida-ne'e, sira haksumik tiha Maromak nia

oin ba nia. Moisés ne'ebé Maromak dirije ninia liafuan bá iha ai-hun ne'ebé lakan, husi inísiu kedes hetan tratamento nu'udar oan. Maibé oan-mane ida ne'ebé iha esperiênsia problemática kona-ba paternidade.

Testu tomak ko'alía kona-ba «haree»: uluknanai Moisés ne'ebé hakarak haree; hafoin Maromak ninia haree; iha klaran en-kontru no Moisés ne'ebé falun oin atu la haree Maromak. Ema sei hanoin hikas Moisés nu'udar ida-ne'ebé horik iha Maromak nia oin, oin ho oin, ko'alía ba Nia ibun ho ibun. Maromak haree ninia povu nia mizéria eh moris susar no deside ninia libertasaun. Maski nune'e, maski haree pesoalmente no maski nia tuun atu liberta, Na'i haruka Moisés ba liberta Israel: Moisés sei sai libertadór, hamutuk ho Maromak no tanba Nia. Maromak la liberta ninia povu lahó Moisés; Moisés la liberta povu lahó Maromak. Ne'e mak aliansa ida ona. Eleitu ida-ne'e nia misaun mak ida foti filafali itinerânsia entre mundu lahanesan atubele hetan filafali povu Israel nu'udar povu ninia maunalin sira nian no halo sira sai bá rai prometida. Nune'e nia tenke konfronta an ho kestaun paternidade nian. Iha itinerânsia ida-ne'e, defaktu, la-bele la evita konfrontu ho aman Ejitu nian, Faraó. Maromak la haree de'it ninia povu nia mizéria, Nia haree mós luta ne'ebé liga ho libertasaun no hatudu ba ninia eleitu. Moisés, ne'ebé lori naran Ejitu nian no sai Faraó nia oan-feto nia oan-mane (i nune'e Ejitu nia oan-mane ida), ne'ebé hetan perigmate nian husi liurai presidente no oras ne'e tenke enfrenta aman foun Ejitu nian, tenke fila hikas ba rai ne'ebé salva nia no kuaze hamate nia, atu bá luta hasoru Faraó. Idane'e sei sai konfrontu ida entre aman sira: husi parte ida Faraó. No husi parte seluk? Maromak eh Moisés? Moisés hatene reziste tentasaun atu sai Israel nia aman? Moisés hatene reziste ba inklinasaun aat (salan ori-jinál) atu foti Maromak nia fatin?

Prioridade sira evidente liu: Israel mak Maromak nia oan, la'ós Moisés nian no menus liután Faraó nian. Maibé la'ós oan mesak. Povu hotu (família sira hotu rai nian iha Abraão nia vokasaun) mak Maromak nia oan

sira, Ejitu móis, nune'e la'ós Faraó nia oan. Maibé rekoñesimentu ida-ne'e bele akontese de'it liuhusi mediasaun Israel nian, oan-mane boot. No iha povu ida-ne'e nia laran de'it, oinseluk husi buat ne'ebé akontese ho sira seluk, sei tenke renunsia paternidade, ne'ebé kabe de'it ba Maromak. Se mane ida, maski liurai Israel nian, apropropria autoridade ida-ne'e nia sei sai kauza mate nian no la'ós moris nian, malisan nian no la'ós bensan nian (hanesan Bíblia haktuir mai ita).

Simu bolun ba empreza ida boot hanesan ne'e, Moisés buka reziste: nia la'ós lia-na'in di'ak ida; oinsá nia bele konvinse Israel oan sira no liután Faraó katak Maromak mak haruka nia?

Loloos, iha kle'an liu, objesaun Moisés nian mak objesaun kona-ba frakeza liafuan nian. Ne'e mak kilat ida fraku liu hasoru Faraó. Autoridade manu-



ain nian tenke sura ho forsa ida boot liután. Nune'e fó ba nia ai-tonka milagre nian. Maski nune'e Moisés tenke liuliu sai ema liafuan nian. Liafuan ne'ebé komanda no ameasa móis. Maibé nafatin liafuan de'it, nu'udar konvein iha maun-alin sira nia leet. Força paterna (ne'ebé dalabarak mosu hanesan frakeza) nafatin pretense ba Maromak, no bainhira Moisés la konfia ba forsa ida-ne'e, nia halo salan ida ne'ebé nia tenke selu hodi la tama iha rai prometida.

Moisés nia figura nia pedasuk sira-ne'e hatudu mai ita elementu ida ne'ebé merese atu subliña: Maromak ne'ebé bolu, haruka sai husi «aman nia uma», hanesan akontese ho modelu fiar Abraão nian. Paternidade folin liu nune'e ambígua: halo moris, maibé bele móis halo mate. Husi parte seluk «ézodu» husi aman nia uman loke itinerânsia ida ne'ebé bele sai possibilidade enkontru nian ho Maromak no ho fraternidade tanba ne'e mak dalan libertasaun husi tusan aman nian («pátria» autoritária no halo sai atan) ne'ebé

enkuantu fó identidade ida loke possibilidade separasaun nian husi ema seluk. Israel fali tenke rekoñese Ejitu nu'udar ninia maun, oan husi Aman hanesan.

Dalan ne'e difisil, iha kontraste no dramátiku liu. Risku atu lakon, atu sai instavel maka'as no mesa-mesak iha mundu ida ne'ebé moris oinseluk liu. Hanesan ne'e duni tanba buat ne'ebé iha nia klaran mak buat boot ida: revelasaun Maromak nia oin nian no ema nia salvasaun. Tanba ne'e iha esperiênsia «dezerto» nian ida-ne'e, esperiênsia «liberdade difisil ida», hatudu perigu ida boot liu. Ida hakaran eh dezeju atu fila

fali ba Ejitu, iha ne'ebé sai atan maibé pelumenus bele han. Atu loke konfrontu ida ho imajenaat sira ne'ebé ita halo kona-ba Nia, Maromak apresenta an nu'udar Estranjeiru no hatudu an rasin nu'udar «fraku» liu. Ita bele konfia ba Maromak ida ne'ebé «estrañu» hanesan ne'e? Liafuan bele halo sá loos hasoru símbolu potênsia rai nian ne'ebé boot, katak kontra Faraó? No tanba sá konfia ba bibiatan la'o-rai ida Madian nian envezde ba liurai-oan ida no ulun ba ezérstu boot ida?

### Gia ba maun-alin rebelde sira

Moisés sei sai gia ida, la'ós Aman ida. Nia simu knaar husi Aman atu hasai oan Israel husi moris-atan Ejitu nian, katak husi paternidade Ejitu nian. No hanesan nia antisipa husi kellas ninia enkontru dahuluk ho ebreu sira, nia mak maun no nafatin maun ida. Tanba okupadu ho ninia ministériu nia haluha móis ninia família no atu mate sala-sala tanba kolen ne'ebé hanehan nia atu administra ema sira ne'ebé difisil liu iha situasaun ne'ebé susar liu nia laran. Maibé nia kontinua atu hakle'an ninia solidariedade ho povu ne'ebé nia hola parte bá.

Espesialista kona-ba sai ba li'ur no kruzamento sira, Moisés konta nafatin iha Maro-

mak nia prezensa, nu'udar povu nia matadalán no apoio loloos, ne'ebé lider «Ejitu nian» ne'e liberta maibé la pretense ba nia. Moisés mak, iha itineránsia eh viajem ne'e tomak, hamutuk ho povu, aprende atu hola parte ba beibeik ba Israel, hodi sai ba hotu maun ba «nia maun-alin» ebreu sira.

Tebes duni katak ninia pozisaun espesiál liu iha intimidade ho Na'i, no ba momentu ida nia tenke haksumik nia oin ba Israel sira tanba naksira demais Maromak nia glória. Maibé nia nunka hatudu an nu'udar defensór maka'as ba ninia priviléjiu: nia mak gia, mediadór, profeta, intersetor. Maibé pozisaun ida-ne'e nunka distinge to'o haketak nia (halulik nia) husi ema seluk (hanesan ne'e mós lmak tenke akontese ba liurai).

Moisés kontinua solidáriu ho Israel, ho modu nakonu iha maun-alin sira nia leet. No nia konsege iha empreza ida-ne'e tanba nia la'ós hanesan sira seluk iha motivu raan nian ne'ebé liga nia ba grupu ida eh ba papél/ knaar ida.

Solidariedade ida ne'e sei kusta karu liu ba Moisés (hanesan ba profeta hotu no ikusmai mós ba Jezús). To'o pontu ho povu, no tanba povu, nia tenke terus Maromak nia distânsia.

### Sai hodi labele tama

Moisés sai no halo sai... Maibé nia bele tama iha parte ruma? Nia bele finalmente hetan uma iha fatin ruma? Ne'e mak nia hakarak. Nia halo sai maibé labele halo tama tanba nia sala, hanesan jerasaun hotu ne'ebé sai husi Ejitu.

Kuriozu duni: ita halo buat hotu atu deskreve ita-nia santu sira lahó defeitu sira; Bíblia la laran rua-rua atu buka ema nia salan, iha Moisés mós. Maibé nia halo saida? Nia "baku" fatuk-boot, bainhira Na'i fó orden atu "ko'alía". Aleinde ne'e nia baku "dala rua"... Nia la konfia iha «frakeza» liafuan ida ne'ebé Maromak autoriza atu ko'alía, hodi sura fali iha ai-tonka milagre nia kbiit nune'e monu ba povu nia fiar-laek. Tanba ne'e nia sei mate iha rai-fuik maran, hodi labele tama iha rai. La'ós nia mak sei gia povu iha Canaan, la'ós mós nia oan-mane. Ida ne'ebé sei

gia Israel atu konkista rai mak Josué, Nun nia oan-mane.

Moisés aprende haraik-an no Maromak halo nia sai hanesan ho ninja jerasaun tomak, maski nia konserteza di'ak liu sira barak. Maibé iha Maromak nia oin ema ne'ebé mak bele dehan ninia an justu? Fraternidade nia fundamentu mak paternidade ida mesak, paternidade Maromak nian, maibé ema sira aprende solidariedade no igualdade liuhusi nesesidade, terus, ksolok no... perdaun mós.

### Buat ne'ebé hela mak lei, “vizaun” no re'in ida

Ikusmai saida mak husik hela husi Moisés? No saida mak husi nia husik mai ita? Hela mak liafuan lei nian, «vizaun» ida no re'in eh beiju ida. No loloos ne'e mak buat hotu ne'ebé ema ida ne'ebé aseita ninia imperfeisaun (la kompletu) bele hakarak. Buat ida-ne'e mós mak halo Moisés atu sai liután maun duké aman.

### Liafuan lei nian

Se sai bá li'ur perigozu duni no presiza matadalán ida, lei ne'ebé Moisés entrega ba Israel la'ós buat seluk maibé matadalán nesesária iha libertasaun difisil iha rai-fuik maran. Tanba moris katak hetan apoio husi promesa kona-ba don ida no nune'e hanesan la'o iha dezertu ida (seidauk iha don) bá to'o rai (don sei iha). Tempu promesa nian loke ba tempu realizasaun nian, maibé moris katak horik iha tempu nia leet hein nian. Maski nune'e, hanesan istória Israel nian hatudu, rai prometida mós la'ós meta definitiva. Nia sei lakon no sei sai sinál ba meta definitiva ida ne'ebé iha fatin seluk, no katak buat ne'ebé Aman prepara mak reinu ba nia oan sira hotu. Tanba ne'e presiza gia ida iha rai-fuik maran no iha rai. Ida ikus ne'e mós sei iha ninia tentasaun sira, no tentasaun hira kedas. Lei hanorin atu reziste saida no oinsá loos, no la'ós koinsidénsia de'it mak Jezús iha dezertu foti liafuan husi "Deuterónómio" duni atu rejeita Satanás nia tentasaun sira.

## Vizaun

Maibé promessa atu hamriik metin iha adversidade sira moris nian ne'ebé koko fiar maka's la to'o de'it ukun-fuan. Lei rasik iha nesesidade atu hetan apoiu husi «vizaun». «Vizaun» Maromak nian no «vizaun» ninia don nian. Ne'e mak buat ne'ebé oferese ba Moisés iha nia moris nia rohan no ida-ne'e mak nia oferese mai ita.

## Re'in

Ho kapasidade to'o rohan atu la halo nia an nu'udar aman, Maromak foti Moisés hamutuk ho aman sira: rai ne'ebé oras-ne'e nia bele kontempla sei sai fatin ba dexendénsia ida ne'ebé sei sai mós ninian!

No Moisés, Na'i nia atan, mate «iha Na'i nia nia ibun». Signifika tuir Na'i nia orden, maibé literalmente bele indika re'in ida. Moisés mate iha intimidade Maromak nian, ho mistériu ne'ebé hakohak no falun nia. Ema ida la hatene to'o ohin loron ninia fatin hakoi nian, sinál misteriozu moris-hi'as nian.

La'ós desizivu tama: ida-ne'e la'ós ita-nia knaar. Ne'e prezente ida no se haree didi'ak haraik tiha ona mai ita iha intimidade ne'ebé Na'i oferese mai ita husi oras-ne'e kedas. Buat ne'ebé husu mai ita mak sai. No iha buat ne'e, Moisés , prefigurasau eh ilas Jezús nian, mak ita-nia mestre.

Moisés nia moris, hanesan mós ho ida profeta boot sira Israel nian, hatudu mai ita solidariedade ho povu aliansa nian to'o iha ne'ebé. Nia hanorin ita oinsá luta kontra imajen aat kona-ba Maromak nia paternidade bele maka'as no mós determinante. Moisés rasik ne'ebé iha nia ezisténsia iha rai la konsegue to'o, halo ita sai nia maun-alin sira, ikusmai, hanesan akontese ho Abraão, sei lori ba itania filiasaun iha Aman Maromak.

## Ba ha'u-nia moris

Sé mak "ha'u-nia povu", "ha'u-nia ema"? Simplesmente ha'u nia parente raan nian? Simplesmente ha'u-nia sidadaun maluk sira?

Simplesmente sira ne'ebé politikamente besik ha'u? Sira ne'ebé ha'u-nia komunidade nian?

Eh ha'u iha kapasidade atu haluan ha'u-nia hateken no haree ho Aman nia matan?

Sá loos ha'u-nia nível envolvimentu nian ho "ha'u nia ema"?

Ha'u hatene haksolok ho sira? Terus ho sira? Luta ho sira? Aprende husi sira? Halo ha'u-nia an sai "ida" ho sira? La'o ho sira? Partilla ho sira kosolok terus?

Ha'u hirus bainhira ha'u haree violénsia ha-soru ema fraku no kbiit-laek sira?

Ha'u nia raan nakali bainhira ha'u haree "kbiit-na'in sira nia arrogânsia"?

Ha'u sente devér atu sai parte ativa atu defende ema nia dignidade?

Ha'u fiar iha liafuan onesta no moos nia kbiit?

Ha'u-nia liafuan lia-bosok? Ha'u nega ohin buat ne'ebé ha'u dehan horisehik?

Ha'u iha kapasidade atu husik Liafuan leno ha'u?

Ha'u hatene rekoñese Liafuan nia prezensa iha ai-hun ne'ebé lakan ne'ebé ha'u hasoru iha ha'u-nia dalan moris nian?

Ha'u fó espasu ba Aman atu bele gia no tahan ha'u? Ha'u husik Nia "re'in" ha'u?

Ha'u iha haraik-an atu rekoñese se Aman la tulun ha'u ha'u bele halo uitoan de'it?

Ha'u hanoin katak ha'u mak "maluk ho maluk sira"? ne'ebé lahó "ha'u-nia maluk sira dalan nian" nia apoiu no solidariedade ha'u labele realiza buat ida?

Hanesan Moisés nia inan, ha'u prontu ba ha'u-nia sakrifisiu, atu fó "moris" ba maun-alin sira?

Ha'u iha tendénsia atu hili "inan sira nia konspirasaun" ka "«aman sira»nia hirus boot hodi oho"?

(JG)

ITANIA ESPIRITUALIDADE



Tatoli - Fila fali ba about

# Santa Teresa d'Ávila gia espirituál iha dalan ksolok no glória nian

Iha programasaun ba 2017, Komunidade Edukativa FMA hili atu tau nu 'udar titulu ba ninia projetu lema ne'e: «Ita mak família: ita akompaña malu atu sai rai ne'ebé vida no domin buras». Akompañamentu mak sai liafuan xave atu realiza didi'ak ita-nia hilin sira. Nune'e, ita sei ba hakle'an estilu akompañamentu salezianu ne'ebé ita-nia Fundadór/a sira trasa mai ita.– ba ida espirituál. Modelu ida mak Teresa d'Avila.

Reformadora Carmelo nian, S. Teresa (1515-1582) simu naran nu'udar Mater spiritualis, hanesan hakerek iha estátua ne'ebé ita hetan iha Bazílika S. Pedro iha Roma nia okos; Inan ne'ebé hakarak halo dalan ida perfei-saun nian.

Iha tempu ida nakonu ho dezafiu sira ba vida Kreda ekleziál, no monástika ho modu partikulár, la kontente de'it atu denunsia vísiu no defeitu sira ninia tempu nian, hanesan reformadór barak halo, maibé nia preokupa atu hatudu dalan ida esperansa no renova-saun nian.

Don Bosco, hodi hili S. Teresa d'Ávila nu'udar Patrona Instituti FMA nian, hakarak konfia ninia família relijioza ba feto ida ne'ebé hatene tau hamutuk ideál apostóliko ho ida kontemplativu. Ida-ne'e mak espiritualidade ida lahó konflitu eh dikotomia/separasaun. Iha nia buat umanu nian hetan valorizasaun no unifika iha Maromak nia prezensa. Ida-ne'e halo ita hakfodak se ita enkuadra iha tempu reforma Lutero nian, ne'ebé iha kór pesimizmu nian.

Teresa hatene armoniza kontemplasaun ho atividade kolen-laek, espíritu fiar nian no konkretude pedagójika hodi gia Irmán sira, interioridade no ksolok komunikasaun nian, umildade no sentidu krítiku. Nia esprime experiénsia espirituál iha ótica **amizade ho Maromak no ho ema seluk**.

Iha 'Cammino di perfezione' nia salienta oinsá importante hamrook ba bee moris kontemplasaun nian, intimidade nian iha orasaun no, tempu hanesan, «hatudu ternura, sai sen-

sivel ba Irmán sira ninia terus no nia moras ki'ik liu».

Hasoru Maromak mak defaktu, horik iha domin. Katak hasoru an rasik, manán liberdade espiritu nian no nune'e hakore an husi buat ne'ebé liu lais no moris iha don an rasik nian no iha dame interiór. Integrasaun perspetiva nian ida-ne'e no vizaun otimista ne'e mak buat ne'ebé Don Bosco no Maria D. Mazzarello hakarak tebes.



## Aspetu sira S. Teresa nia espiritualidade nian

S. Teresa buka akompañamentu ba ninia experiénsia moris nian no hafoin kommunika grasa ne'ebé nia simu hodi tau iha ninia Irmán sira ninia liman nune'e halakan mós iha sira dezefu ba Maromak.

Ninia estilu akompañamentu nian karakteriza ho sabedouria no inan ida nia afetu ne'ebé iha kuidadu ba ninia oan-feto sira no halo sira hadomi nia.

Nia fó ba sira dezafiu ida ne'ebé bele esprime

nune'e: se Maromak realiza buat ne'e hotu iha ha'u, apezárde ha'u-nia limite sira, tanba sá mak nia la halo mós ho ó?

S. Teresa nia obra sira, práтика liu duké teórika, komunika esperiénsia ida no buat ne'ebé nia hanorin liuhusi ninia hakerek sira bazeia ba vizaun psikolójika kroat, rezultadu husi esperiénsia pesoál no espíritu observasaun ne'ebé forte kona-ba ema seluk nia konduta eh hahalok.

Karik tanba ne'e mak majistériu espirituál S. Teresa nian soi influénsia importante ba teolojia vida espirituál nian.

S. Francisco de Sales no S. Alfonso de' Liguori mós devotu S. Teresa nian. Santa Carmelita ida-ne'e nia mérito no orijinalidade mak armoniza movimentu rua karidade nian ba Maromak no ba maluk. Ba nia aspetu rua depende malu ho modu resíproku no habiit malu. Ho razaun bele hanaran "mística asaun apostólika nian" tanba moris no atua Espíritu Santu no ninia don sira nia influénsia no buka komunika ba ema seluk esperiénsia kle'an ne'ebé nia moris.

Karizma terezianu mosu nu'udar Maromak nia resposta ida ba eziénsia profundidade nian ne'ebé soi iha ema no resposta ida ba Kreda nia nesesidade sira, ne'ebé moris iha tempu hakmatek-laek no lakon-dalan nian.

## 1. Orasaun

Aspetu xave sira Teresa nia espiritualidade nian soi ninia sentru iha orasaun nu'udar komuñaun ho Maromak. Ba nia, kompromete an iha vida espirituál signifika, tempu hanesan, kompromete an iha dalan orasaun nian. Orasaun mak «**relasaun amizade nian**: hamutuk beibeik mesa-mesak ho Nia ne'ebé ita hatene hadomi ita»». Santa Teresa insiste iha faktu katak ita la bá orasaun atu buka konsolasau nia no ita an rasik nia realizasaun, maibé atu bele sai tebes duni "atan sira domin nian", katak atu bele serví

"ho justisa, fortaleza no haraik-an".

Orasaun auténtika la habiit mentalidade ego-séntrika, iha kontráriu: nia sai fonte espíritu servisu nian no disponibilidade ba ema seluk.

Nune'e, uniaun ho Maromak ba Teresa la'ós ezersísiu ida ba momentu ruma, maibé forma ida moris nian. Ne'e mak hahlok ida "horik ho Nia" nune'e, ida-ne'e mak lurón ne'ebé lori diretamente ba meta, liufali "hanoin barak". Ba nia harohan katak **horik iha Amigu divinu nia prezensa**, hateke oin ho oin ho Nia, moris iha Trindade nia hakmaluk. Tanba ne'e nia bele hakerek iha surat ida ba jesuita Padre Ávila: «Bainhira ha'u hanoin ba grasa ne'ebé Na'i halo mai ha'u hodi mantein nafatin ha'u iha ninia prezensa, apezárde buat wain ne'ebé liu husi ha'u-nia liman, ha'u konvensida ba beibeik katak krús no persegisaun grave liu mós sei

la soi atu disturba ha'u...» (Surat 235).

Liuhusi faze oioin orasaun nian Teresa konsege halo atu «la husik ba klamar okupasaun seluk se la'ós konversa ho Nia ne'ebé prezente» (ivi). No la presiza liafuan barak, Maromak «komprende ita liuhusi sinál mós». **Diálogo hotu bele redús ba hateken ida!** «Maromak no klamar komprende malu hanesan belun na'in rua, lahó nesesidade liafuan nian eh sinál esternu seluk, hodi manifesta afetu ba malu. Uitoan hanesan iha mundu ne'e, bainhira ema na'in rua hadomi malu maka'as... sira konsege komprende malu lahó nesesidade atu troka jestu sira, maibé hodi hateke de'it».

Ba esperiénsia orasaun nian indispensavel **umildade**. S. Teresa fó hanoin maka'as kona-ba umildade tanba nia iha konxiénsia maka'as kona-ba nina mizéria no pobreza. Antítezi: mizerikórdia/mízera, Maromak nia forsa/frakeza umana halo parte vida espirituál. Rekoñese ho umildade an rasik nia mizéria mak kondisaun atu fluxu mizerikórdia nian bele habelar iha klamar. Ho tulun extraordináriu grasa mística nian, Teresa haree oinsá salan, hodi falun klamar ho abu-

abu mahar, impede atu reflete Maromak nia glória ne'ebé horik iha ninia sentru íntimu liu. Hetok hakbesik liu ba Maromak no hetok sai boot iha koñesimentu no aseitasaun ba pobreza rasik. Maromak ninia hateken no ninia domin la'ós de'it hatudu mai ita imperfeisaun no salan sira, maibé kontribui atu kura no nakfilak sira.

## 2. Laran-manas apostóliku, tutun kontemplasaun nian

Orasaun mak bee-matan iha-ne'ebé suli atividade apostólica, basá orasaun “prodús obra sira”. Santu sira, “los olvidados de sí” (sira ne'ebé haluha an rasik), sira konsentra totalmente iha Maromak to'o konsege hadaet santidade ba ema seluk.

«Se ema ne'ebé hahú hakaas an ho Maromak nia favór atu to'o iha perfeisaun nia tutun, ha'u fiar katak nia sei la tama mesak iha lalehan, maibé sei halo ninia entrada, hodi dada ho nia ema barak, hanesan kapitaun di'ak ida ne'ebé Maromak entrega ninia kompañía». Konsekuénsia ida orasaun loos nian mak dilatasau (sai boot) klamar nian, ne'ebé iha fiar deskobre orizonte apostóliku sira ne'ebé sai luan ba beibeik, aleinde projeto umanu sira. Defaktu, orasaun permiti atu penetra Maromak nia vontade salvasaun nian no nunc'e revela mai ita nesesidade real Kreda nian no maluk sira nian.

Teresa rekoñiese katak servisu di'ak liu halo ba Kreda noumanidade mak ida sai santu no promove mós ema seluk ba santidade. Sai santu kontemplativu sira: lahó sasin ida-ne'e Kreda lakon ninia misaun orijinal; defaktu nia la buras iha estensaun ho pregasaun no konversaun de'it, maibé tenke sai boot iha ninia dalan komuñaun nian ho Kristu no iha ninia esperiénsia kle'an Espíritu nian. Fekundidade apostólica depende liuliu husi kualidade vida orasaun nian, husi atitude babukak Maromak nian no husi imitasaun Kristu nian.

Santa Teresa iha ninia livru “Il castello interiore”, bainhira ko'alia kona-ba “uma da-hituk”, etapa ikus nian, tutun moris batizmu

nian, iha-ne'ebé moris ho intensidade liután transparénsia Espíritu Santu nian, nia deskreve esperiénsia ne'e:

- nu'udar unidade nakonu kontemplasaun no asaun nian,
- nu'udar interiorizasaun másima kesi ho alteridade másima.

Konkista interioridade nian – Teresa nota – komporta abertura boot liután ba maluk.

Paradigma ne'ebé nia hili atu deskreve diálogu domin operativu ne'e mak ida Marta no Maria nian, ne'ebé simboliza armonia entre asaun no kontemplasaun.

«Fiar ha'u bá, atu simu Na'i, iha Nia nafatin ho ita, haree presiza atu Marta no Maria konkorda malu. Oinsá mak Maria, tur iha ninia ain bele, fó han ba nia se ninia biin la tulun nia? Sei fó han ba Na'i bainhira halo buat ne'ebé posivel atu manán klamar barak, ne'ebé hodi hetan salvasaun bele hahí nia ba nafatin».

Iha testu ida-ne'e salienta valór apostóliku vida kontemplativa nian. Elementu unifikadór mak domin. Teresa hakerek: «Sei sai difisil se bele halo orasaun iha fatin ketak de'it... Domin-na'in ne'ebé loos hadomi iha-ne'ebé de'it no hanoin nafatin ninia».

## 3. Komunidade espasu domin no ksolok nian

Tanba admira Jezús, Teresa buka Nia iha ne'ebé de'it Nia horik bá, ho modu partikular iha **komunidade**. Nia hanaran “Kristu nia koléjiu”, Betânia foun iha-ne'ebé Na'i



horik “iha belun sira forte iha Maromak” nia leet. Jezús mak “Belun loos”, “sasin ba buat hotu ne’ebé ita halo”. Teresa konxiente katak Nia mak “funda” Konventu sira. Defaktu nia hateten: “Na’i mak hahú bolu”, eh hodi refere mós ba vokasaun foun sira: “Haree momoos katak Na’i hili daudaun sira”. Nia “la’o ho ita”.

Hodi bali domin ba malu permite atu Na’i ukun iha ita leet. Tanba ne’e Teresa kondená komunidade ne’ebé ho sira-nia divizaun halakon Jezús nia prezensa: «Se karik verifikasi lia latuir-malu ki’ik-oan ida, tau kedas ai-moruk; iha kontráriu se ne’e bá oin ho grupu ki’ik-oan sira eh se hakaran atu iha fatin dahuluk eh pontu onra nian ida, hatene bá katak sira duni sai Na’i husi uma; hakruuk ba Ninja Majestade, buka atu evita dezastre tanba presiza ta’uk katak iha sira leet iha Judas rumá.....».

Komunidade teresiana mak koinonia ida, komunidade agápika ida ne’ebé bazeia ba domin resíproku, tanba “hotu-hotu iha kapasidade atu hadomi”. Tanba ne’e iha Konventu S. José “hotu-hotu tenke sente nu’udar belun, hotu-hotu tenke hadomi malu, hadomi no tulun malu”. No ida-ne’e lori “ksolok santa”, klima ida “ksolok no liberdade” nian ne’ebé ita presiza halo dalan, sinál prezensa Maromak nia Reino nian oras-ne’e ona.

S. Teresa hakarak kuda iha konvivénsia fraterna nia laran **tón ida ksolok** interiór no esteriór nian, hakmatek no liberdade espíritu nian, jovialidade/ksolok no sentido umór nian ne’ebé halo moris sai simpática no atraente.

Nia buka ekilíbriu entre solidaun no ksolok komunikasaun nian, entre monotonia loroloron nian no selebrasaun festa nian. Nia la pretende atu forma ema sira marka ho peniténzia, maibé harohan-na’in no “atan domin nian”.

**Rekreiu** iha espiritualidade teresiana mak ema hotu no ema ida-idak nia obra. Nia tau domin iha prova no nu’udar espresaun baibain ida domin nian. Bainhira ko’alia kona-ba domin perfeitu Teresa

esprime nune’e: «Durante rekreiu, se Irmán ida presiza kmaan no buka divertimentu uitoan, imi komporta an ho ksolok, maski imi la iha hakaran. Se imi atua ho prudénsia, buat hotu sei muda iha domin perfeitu».

La iha membtu ida komunidade nian evita husi rekreiu. Ba S. Teresa, religioza ne’ebé buka solidau durante rekreiu nia la sala de’it, maibé nia apresenta sintoma perigozu.

Ba nia, komunidade esensiál ba implementasaun fiél vida kontemplativa nian. Virtude humana sira ne’ebé favorese ida-ne’e mak amabilidade, jenerozidade, liberdade espíritu nian, axeze no umildade. Aleinde ne’e presiza la hakat liu iha regulamentu sira no iha observánsia sira.

Teresa hatudu nia an humana liu bainhira considera nesesidade oioin ema nia, maibé tempu hanesan kondena nakukun sira ne’ebé tau hani ba fraternidade, liului sentimentalizmu no amizade partikulár sira. Buat sira-ne’e impide sirkulasau karidade loos nian no sai peste ida ne’ebé labele kura”, komunidade nia destruisaun. Tanba ne’e nia fó hanoin ba superiora atu matan moris kona-ba ne’e no opoin ho enerjia atu fokit sai buat atu ne’e no nia hakerek nune’e: «Susar ba konventu ne’ebé buat ne’e tama! Ha’u prefere atu ahi mak tama no halo ita hotu sai akudesan!....».

Domin ne’ebé Teresa propoin mak domin ida forte, maka’as, puru, maskulinu hanesan Kristu no femininu hanesan S. Monica nian, modelu apropiadu konstânsia no fidelidade nian iha domin. Santa ne’e koñese hodi esperiênsia direta vantajen amizade loos nian ne’ebé nia abut mak domin ida “santu no perfeitu” no hakerek: «Se ha’u la iha infernu, depoizde Maromak, ha’u deve ba klamar sira ne’ebé ha’u ko’alia bá, sira ne’ebé ha’u buka atu rekomenda an ba sira nia orasaun»..

#### 4. Maria nia prezensa iha vida orasaun nian

Iha S. Teresa nia vida no obra sira ita apelu barak ba Maria. Nia hanoin jestu espontáneu ne’ebé nia halo sei labarik bain-

hira, lakon nia mamá iha idade 12, hodi tanis nia bá hakne'ak iha Na'i-Feto nia ilas ida nia oin, hodi husu ba nia atu sai nia inan. Nia rekoñese katak Maria rona nia orasaun tanba Nia sempre simu ita-nia pedidu hotu no remata: "Nia, ikusmai, halo ha'u sai ninian" (Vita I 7).

Teresa parese la kole atu esprime ninia ksolok hotu atu lori "Maria nia unuk", próprio iha Orden karmelita, hodi konsidera ne'e sinál partikulár ida hola-parté nian ba Nia. Defaktu ba Maria mak nia dirije Orden, regra, ábitu, religioza sira no uma sira, hanaran "Santa Maria nia uma sira". Na'i-Feto mak "Inan, Patrona no Señora" komunidade nian, "Nia ne'ebé proteje ita hotu", basá nia mak Fundadora lo-loos Karmelu nian.

Loron ida Teresa haree katak Jezús agradese nia ba buat ne'ebé nia halo ba ninia Inan. Dala seluk nia kontempla Na'i-Feto ne'ebé lolo ninia mantu atu proteje sira.

S. Teresa sente Maria nia prezensa iha ninia sorin, no konsidera nia nu'udar superiora lo-loos Konventu sira-nian. Bainhira nia to'o iha Konventu Inkarnasaun nian, nia tau Maria nia estátua iha superiora nia fatin. Nia iha vizaun furak ida iha Konventu ne'e iha ninia tinan dahuluk ne'ebé nia sai superiora, hanesan nia rasik haktuir: «[Hotu tiha Kompletas] Iha pontu atu hahú Salve Regina, ha'u haree Maromak nia Inan tun husi lalehan entre anju lubuk ida nia leet no hatur an iha Superiora ninia fatin, iha ne'ebé iha Na'i-Feto nia estátua. Estátua hanesan fó fatin ba Na'i-Feto kmanek ne'e... No nia horik iha-ne'ebá tempu tomak Salve nian no dehan mai ha'u: "Ó halo di'ak atu tau ha'u iha-ne'e. Ha'u sei sai prezente nafatin iha hahí sira ne'ebé sei hasa' e ba ha'u-nia Oan-Mane no sei aprezenta ba Nia"».

Maria mak modelu iha dalan



orasaun nian, tanba ninia haraik-an ne'ebé hodi loke fuan ba Maromak no ba akollimentu krús nian iha fiar tomak. Teresa halo komprende katak grasa mística sira no tutun uniaun nian ho Maromak haraik hotu ba Maria ho sasukat naresin se konfronta ho kriatura sira seluk tanba nia sempre atua hodi Espíritu Santo nia kbiit.

### **Referénsia sira ba S. Teresa iha Maria D. Mazzarello nia esperiénsia**

Iha Maria Domenica Mazzarello nia formasaun espiritual bele nota influénsia signifikativa S. Teresa d'Avila nian, diretamente: liuhusi leitura ba ninia obra ruma (n.e. La Vita), nune'e mós indiretamente: liuhusi Giuseppe Frassinetti nia mediasaun, padre Pestarino ninia belun boot no mestre nune'e mós konfesór estraordináriu "Filhas de Imaculada" nian iha Mornese. Ninia obra axética sira nakonu ho Santa Teresa nia doutrina.

"Filhas de Imaculada" nia formasaun nia parte boot mak "teresiana" tanba konseitu orasaun nian, nune'e mós ba "amizade espiritual sira" ne'ebé tulun atu lori ba santidade. Tanba obra formasaun Frassinetti nian, "Filhas de Imaculada" koñese parte ruma Cammino di perfezione mensiona iha kontributu: Pater noster di S. Teresa di Gesù. Trattato della preghiera (Parma 1860) ne'ebé nia rasik elabora husi Teresa nia espiritualidade.

Sira mós lee livru: Le amicizie spirituali, imitazione di S. Teresa ne'ebé Autór rasik publiqua iha Genova iha 1853. Macconno hakerek katak ne'e mak panfletu ida ne'ebé "sira hotu iha".

Testemuñu ida foti husi Madre Petronilla Mazzarello nia biografia interesante tebes. Ferik ona nia gosta filafali ba leitura sira

ne'ebé leno tinan juventude Maria Domenica nian no nunc'e mak nia hanoin hikas: «Dalabarak ha'u hetan nia okupada ho leitura pedidu sira Pater Santa Teresa nian. Bainhira ha'u to'o, nia pasa kellas livru mai ha'u atu ha'u lee ho lian aas parte ida no hafoin tenik fali ho ha'u-nia liafuan rasik. Kona-ba komentáriu nia mak hanoin no nia halo ho simplisidade. Nia apresia tebes leitura livru ne'e nian no buka atu halo ha'u apresia [...]. Nia halo ha'u hakerek S. Teresa nia fraze sira ne'ebé ko'alia kona-ba Maromak nia prezensa».

Irmán Petronilla rasik hateten katak Madre Mazzarello fó hanoin hikas beibeik ba Irmán sira S. Teresa nia fraze: «Buat ida keta perturba, buat hotu liu, Maromak la muda, ema ne'ebé iha Maromak iha buat hotu».

Irmán Eulalia Bosco fó sasin iha Prosesu beatifikasiasaun Madre Mazzarello nian: «Nia hakarak atu harohan ba S. Teresa atu invoka domin ba Maromak». No nia haktuir katak loron ida ho laran susar nia dehan ba Irmán sira katak la iha paun ba han meiudia. Irmán sira hatán atu keta preokupa tanba nune'e sira iha okaziaun atu banati tuir S. Teresa ne'ebé sira lee katak nia haksolok bainhira, tur iha meza, nia la hetan buat ne'ebé nesesáriu. No iha loron ne'ebá, maski falta paun, hanesan de'it sira han fehuk no kastaña iha ksolok.

### **Sintonia espirituál entre S. Teresa no S. Maria D. Mazzarello**

Iha ita-nia oin iha dalan rua moris nian na konu ho dosilidade ba Espíritu Santo. Espíritu Santo haluan feto na'in rua ne'e nia fuan atu sira bele sai nakonu ho sabedouria, prudénsia, aten-barani, ho kapasidade atu akompaña ema seluk iha dalan santidade nian. Sira moris iha kontestu ida ne'ebé la kurang konflikto no difikuldade, maibé mós presaun signifikativa ba renovasaun pastorál. Realizmu di'ak ne'ebé sira soi tulun sira atu hetan resposta ba eziénsia sira tempu nian no prepara futuro hodi tau baze sólida sira.

**Grasa komuñaun nian ho Maromak**

naksuli iha sira no habelar iha sira-nia Irmán sira no iha foin-sa'e feto sira. Sira rua hotu hetan inspirasaun atu hahú iha Kreda realidade foun ida: ne'e mak karizma fundasaun nian, ne'ebé Maria Domenica moris iha kolaborasaun ho Don Bosco. Ne'e mak bolun ida ne'ebé hakat liu ema nia kálkulu no avaliasaun hotu. Karizma ne'e atua iha esperiénsia ida marka ho pobreza, ho sofrimentu, ho inserteza no kontradicusaun sira. Maromak già sira no sira-nia dalam mak istória salvasaun nian. Ita haree iha sira moris apaixonada ba Nia. Ninja domin kaer metin sira no sira husik Espíritu mak fó forma ba sira.

Iha Maria Mazzarello hodi akuza katak nia minutu 15 la hanoin Maromak, fó mai ita sasukat oinsá ninia domin ninia atensaun iha matan-moris. Nia la haka'as an de'it atu "hanoin" Maromak, maibé horik iha ninia prezensa, profundamente ida de'it ho Jezús.

**Domin nalakan ba Jezús**, ne'ebé implika hakoren an husi buat hotu, mak liña momoos ida ne'ebé evidencia sintonia profunda entre Maria Domenica nia espiritualidade no espiritualidade karmelita. Ba S. Teresa esperiénsia kristu-séntrika moris liuhusi Jezús nia Umanidade. Ba Maria Mazzarello liuhusi Jezús nia Umanidade eukarística. Partisipasaun ba Eukaristia mak modu adekuadu liu atu hatán ba Na'i nia domin no iha Nia hasoru Irmán sira hotu no ema hotu ne'ebé hadomi.

No defaktu, domin ida ne'ebé la taka iha intimizmu, maibé loke no komunika ba ema seluk. Ema ne'ebé hasoru tebes duni Na'i relativiza buat hotu no hakarak akompaña ema seluk ba bee-matan moris no ksolok ida-ne'e.

S. Teresa hakerek: «Ha'u-nia Na'i, se sira tebes duni koñese Ita, sira sei la tau importânsia tanba buat seluk, tanba Ita laran-luak liu ho ema ne'ebé konfia tebes iha Ita!». Nia eduka tebes nia oan-feto sira atu keta husik eziénsia sira ne'ebé sensivel liu domina sira: «Imi keta buka moris fasil/kómoda... Imi mai atu mate ba Kristu!».

Ida-ne'e mak dezeju hanesan Madre Mazzarello nian, iha oras atu mate, iha esperiénsia espiritual profunda ida, nia hanoin ba ninia Irmán maluk sira nia dalam: «Fó hanoin ba oan-feto sira katak hodi mai iha-ne'e no abandona mundu, ketak halo fali mundu ida hanesan ida-ne'ebé sira husik ona iha-ne'e... [...] Espozu lalehan doben!... no sira dehan katak sira hakarak de'it Ita!... Ah, se sira koñese Ita hanesan ha'u oras-ne'e koñese Ita...».

Koñese Na'i mak kondisaun atu tau an iha Ninia prezensa, hadomi Nia, horik iha Ninia hakmaluk no harohan ba Nia. Haree moos sintonia iha **esperiénsia sira orasaun nian**. La'ós difisil atu dokumenta iha S. Teresa nune'e mós iha Maria D. Mazzarello katak esperiénsia loos orasaun nian mak kestaun domin nian, katak apresia Maromak nia prezensa no haksolok ho Ninia amizade. Nune'e Madre Mazzarello hakerek ba misiónaria dahuluk sira ne'ebé okupada liu ho serbisu no obra apostólica: «Imi mantein, tuij imi-nia kbiit espíritu uniaun nian ho Maromak, horik iha Ninia prezensa nafatin» (S 23, 3).

Kolókiu ho Nia tau ritmu ba FMA dahuluk sira-nia moris no nakfilak buat hotu iha domin: daun nia pontu ida-idak, ain-hakat ida-idak, asaun ida-idak, momentu ida-idak tempu nian.

Orasaun iha estilu salezianu:

- \* mak movimentu úniku karidade nian (art. 38);
- \* loke ita ba Kristu prezente iha ema sira no iha realidade (art. 37);
- \* asaun ida-idak sai fatin enkontru nian ho Maromak (art. 48)

“Grasa unidade nian” mak aspetu centrál ida husi S. Teresa nia espiritualidade, nune'e mós espíritu Mornese nian. Iha Konstituisaun dahuluk sira Don Bosco husu atu iha FMA sira nia moris **Marta no María** “la'o ho ain-hakat hanesan”. Vida kontemplativa no ativa la'ós atu konsidera iha opozisaun ba malu, maibé iha armonia, tanba husi sín-

teze ida-ne'e de'it mak naksuli mai “karidade ne'ebé iha pasiénsia no laran-manas” nu'udar virtude karakterística dahuluk FMA sira-nian (kf Costituzioni 1885).

Tuir reflesaun padre karmelitu Luigi Gaetani OCD, unidade moris nian ne'ebé ita admira iha Santa boot na'in rua ne'e mak rezultadu husi sira-nia **afetu filiál ba María SS.ma** ne'ebé eduka sira atu halo síntese entre kontemplasaun no asaun. Domin ba María mak fatór armonia no unidade interiör nian.

Hanesan Don Bosco, María Domenica mós moris ho María nia orientasaun matenek. Nia esprime ba Nia familiaridade simples, filiál no konfiante. Nia konsidera nu'udar superiora loloos uma nian no iha kalan tau uma-nia xave sira iha ninia ain.

Ida-ne'e mós karakterística típica espiritualidade teresiana. María mak inan no tau matan ba ninia oan-feto ida-idak; nia mak feto memória nian ne'ebé hatene rai di'ak no fó sasin kona-ba Maromak nia obra boboot sira no dosil tomak ba Espíritu, Jezús ninia dixípula, inan no matadalán Kreda nian.

Ema ne'ebé iha Jezús nia prezensa no sente María nia protesaun esperimenta **ksolok**. Interesante atu hanoin hikas fonte ruma kona-ba Don Bosco. Iha ninia vizita ida ba komunidade Alassio nian, Don Bosco husu ba FMA sira: «Imi hotu haksolok? No nia hatutan: «Ha'u hameno imi santidade, siénsia no ksolok! Imi hotu halo Santa Teresa! Imi hanoin bá katak demóniu ta'uk ema ne'ebé haksolok. Nia sei babeur imi ho dezánimu tan serbisu barak ne'ebé imi iha».

Iha Konstituisaun 1885 nian, iha referénsia signifikativa ida ba S. Teresa iha artigu kona-ba Mestra novisa sira-nian: «S. Teresa hakarak Relijioza sira ne'ebé haksolok, sinsera no nakloke. Tanba ne'e Mestra Novisa sira-nian sei iha atensaun atu halo nia aluna sira sai nune'e, basá Irmán sira ho carácter ida-ne'e mak sira ne'ebé iha liu kapasidade atu inspira foin-sa'e feto sira no ema sira mundu nian atu estima no iha domin ba piedade no

Relijiaun».

Don Bosco temi S. Teresa nu'udar mestra ksolok nian, sinseridade nian, abertura nian. Ne'e mak kondisaun sira ne'ebé efikás liu ba misaun edukativa no ba evanjelizaun. Ita hetan iha Maria Mazzarello nu'udar aspetu típiku ninia personalidade nian.

**Lealdade no frankeza** mak elementu sira espiritualidade teresiana no salesiana nian. Domin no lia-loos sempre la'o hamutuk. Lealdade nia espresaun mak hadomi lahodi finji nune'e mós lahodi lohi no la'ós hodi subar ba ema ne'ebé hadomi lia-loos sira maski haterus, maibé nesesária. Ema ne'ebé hadomi iha profundidade la iha kbiit ba oin rua-rua (duplisidade).

S. Teresa hakerak nune'e: «Se sira haree katak belun desvia husi dalan no halo falta rum, sira fó hanoin kedes nia no labele nonook». Madre Mazzarello nakonu ho atitude evanjélica hanesan ida-ne'e hodi tulun Irmán sira atu sai tasak iha frankeza no lia-loos ne'ebé karakteriza nia nu'udar feto no edukadora. Nia hakarak atu Irmán no menina sira sai «franka no sinsera no ho ema hotu» (S 17,1).

Iha mós sintonia barak entre santa na'in rua ne'e kona-ba **vida komunitária** ne'ebé nia abut mak afetu loos biin-alin tasak sira, ne'ebé buka ida-idak nia di'ak lahó infantilizmu seluk eh kobardia. S. Teresa ko'alía kona-ba “domin puru” no Madre Mazzarello hameno karidade, ida loos nian, ne'ebé liberdade mak kria (kf S 35,3) no halo sai auténtika hodi korresaun fraterna. Nia konvensida katak «defeitu ida ne'ebé korrije kedes dalaruma la'ós buat ida, maibé se husik atu nia tau abut, presiza esforsu boot atu fokit sai» (S 17,1).

Karidade fraterna, iha ninia espíritu salesianu puru, hatais ho sinseridade, ‘amorevolezza’, partilla ksolok no terus nian, tulun resiproku, hodi foti ba an rasik buat ne'ebé susar liu no hodi haksolok ho ema seluk nia di'ak. S. Teresa hakerek nune'e: «Maneira furak seluk atu hatudu afetu mak hasai husi

Irmán sira no foti ba an rasik buat ne'ebé difisil liu iha serbisu sira uma nian, nunc'e mós haksolok no agradese Na'i bainhira haree sira halo progresu iha virtude sira».

Iha Mornese akontese atu “na'ok malu sakrifisiu sira”, tanba Irmán sira laranluak liu no haksolok atu kontribui ba ema seluk nia ksolok. Espíritu família nian – hanesan hatudu iha art. 50 Konstituisaun sira-nian – mak harii domin ne'ebé matan-moris no silensiozu loron ba loron: «[Ida-idak] pronta atu hakarak ema seluk nia di'ak liufali ninia an rasik, hili ba nia an parte difisil liu no hala'o ne'e ho simplisidade ne'ebé haraik-an no haksolok hodi moris domin fraternu la'ós de'it iha okaziaun boboot sira, maibé mós no liuliu iha sirkunstánsia ordinária sira moris nian».

### **Konkluzau**

S. Teresa ezerse ba ninia Irmán sira **pedagojia espirituál** lolos ida ho sira ninia esperiénsia rasik kona-ba Maromak no hodi promove kualidade relasaun sira-nian ne'ebé naksuli iha akompañamentu komunitáriu no resiproku.

Akompañamentu komunitáriu nia fuan fekit ho ritmu ekilibradu bainhira Irmán ida-idak ninia matan fihir metin iha Jezús. Ema ne'ebé moris iha Na'i nia hakmaluk de'it mak bele akompaña ema seluk ba bee-matan moris no ksolok nian.

Iha dalan espirituál **la presiza haksolok ho uitoan**, maibé iha objetivu ba radikalidade enkuantu Maromak haraik tuir ita-nia kapasidate nia sasukat atu fó espasu ba akollimentu. S. Teresa hakerek nune'e: «Ha'u hakarak hasa'e lian atu halo hotu-hotu komprende oinsá importante atu la haksolok ho uitoan iha servisu ba Maromak, no halo koñese rikusoin sira ne'ebé simu husi Nia bainhira ita loke an atu simu sira».

Hakle'an S. Teresa no Maria Domenica Mazzarello nia espiritualidade husik ita atu komprende kondisaun ruma ba akompañ-

mentu lolos:

- Dosilidade ba Espíritu Santu;
- Sentralidade Jezús nian iha moris rasik;
- Kapasidade atu husik Maromak kona ita no halo esperiênsia Maromak nian suli ba ema seluk;
- Aseitasaun iha haraik-an kona-ba realidade rasik difikuldade nian, limite nian, salan nian;
- Husik atu ema sira nia nesesidade interpela ita;
- Esperiênsia mariana nu'udar esperiênsia kontemplasaun no unidade interiôr.

Iha Teresa nia projetu edukativu, nune'e mós iha ninia esperiênsia espirituál no ninia proposta pedagójika, iha realidade rua fundamento nian: Kristu no Kreda. **Kristu** mak modelu, umanu no divinu hamutuk, iha maturidade no iha realizasaun. Nia mak Mestre ne'ebé ho delikadeza gia dixípulu iha ninia amizade no iha ninia tatuir hodi bá to'o finalidade transformasaun réal ida. Nia mak molde interiôr atu modela ema ne'ebé hakarak moris nakonu vokasaun sarani ne'ebé, hanesan Teresa afirma iha uma dalimak, nu'udar vida iha Kristu. Iha Nia mak ita het-an síntese valór umanu sira-nian tanba Nia ema loos, no valór sobrenatural, tanba Nia Maromak loos.

**Kreda** ba Teresa mak realidade ida atu moris, orizonte ida servisu konkreto nian iha-ne'ebé tenke empeña ezistênsia rasik. Nia mak estensaun Kristu nian, Ninia prezensa atuál iha mundu, ninia Isin. Nia mak Mestra lia-loos Evanjellu nian no Inan ne'ebé ho ninia sakramento sira habiit moris sarani. Nia mak Maromak raisk nia projetu, ba nia Jezús dirije ninia dixípulu sira ba servisu apostóliku, atu Kreda sai boot iha estensaun no iha profundidade, haluan iha misaun no sai tasak iha ninia membru sira nia santidade.

Kreda ida-ne'e mak, fundamentalmente, verifikasiasaun maturidade sarani nian. Teresa eduka ba disponibilidade ekleziál, atu sente Kreda no sente ho Kreda, atu serbisu no harohan hodi moris "in Ecclesia" no ba Kreda. Maibé hodi sente, ne'e mak buat ruma tere-siano, Kreda konkreta, istórika, ida tempu

rasik ninian, hodi hatán ho modu pozitivu, la'ós ho reasaun maibé ho renovasaun, la'ós ho halerik maibé ho obra sira domin no servisu nian.

Iha ne'e mak haree momoos katak projetu pedagójiku teresiano koinside ho Jezús nian, ne'ebé ho modu progresivu, iha amizade no iha tatuir, halo dixípulu sira sai ema foun, apóstolu sira, santu sira, manu-ain sira Ninia Reinu nian.

Teresa nia liafuan ikus, definitiva, nu'udar edukadora mak konvite ida ba esperansa no ba otimizmu. **Esperansa no otimizmu** iha konfrontu kona-ba ita-nia esperiênsia sira maski frajil no kiak, tanba se ita la fier katak Maromak bele halo iha ita no iha ema seluk buat boot sira, se ita la iha hakaran boot sira, ita sei hela nafatin iha mediokridade. Esperansa no otimizmu mós hasoru situasaun ekleziál, komunitária sira. Maromak kontinua harii ninia obra, maski ema halo salan, no kuda grasa sira ne'ebé di'ak ba tempu atu istória salvasaun nian kontinua ninia dalan to'o bá Reinu ninia kumprimentu.

(Piera Cavaglià)

~~~~~\*\*\*~~~~~

*«Ha'u hatene didi'ak katak ha'u  
iha klamar ida, maibé ha'u la kom-  
prende ninia valór, nune'e mós sé mak  
horik iha nia, tanba loko-an sira ha'u-  
nia moris nian mak taka metin tiha  
ha'u-nia matan sira atu ha'u la haree.  
Se ha'u hatene, hanesan agora, katak  
iha ha'u-nia klamar nia kadunan ki'ik  
ne'e horik Liurai ida boot nune'e, ha'u  
sei la husik nia mesak, maibé ha'u  
ora-oras sei hamaluk nia, no ha'u sei  
badinas atu konserva ha'u-nia an lahó  
foer». (S. Teresa d'Avila).*



# Fuan ororianu

Espresaun “fuan ororianu” furak tebes no hakarak signifika konxiénsia kona-ba ita-nia identidade edukativa, hamutuk ho empeñu atu moris ho modu konstante espíritu da mihi animas iha obediénsia naran de’it ita simu.

Ho “fuan ororianu” ita-nia obra hotu sai oratóriu.

## 1. “Fuan ororianu”: memória Valdocco nian

Espresaun “fuan ororianu” ninia abut lori ba Don Bosco nia práтика iha Oratóriu Valdocco nian. Don Bosco la inventa oratóriu, maibé Don Bosco assume no transforma oratóriu tuir ninia projetu edukativu no pastorál. Atu komprende saida mak “fuan ororianu” nia signifikadu iha Don Bosco nia projetu, ita tenke halo “memória”, memória matenek ida. Don Bosco la’ós teóriku edukasaun nian, maibé operadór diretu. Atu koñese ninia projetu ita tenke konfronta an ho ninia moris. Fatin konkretu iha-ne’ebé Don Bosco realiza ninia projetu edukativu mak Oratóriu Valdocco nian. Valdocco mak “manuál” auténtiku liu ninia projetu edukativu nian.

Hodi halo memória esperiénsia Valdocco nian, ita deskobre dimensaun rumia nia práтика nian: rejenerasaun sosiedade nian liuhusi foin-sa’e sira; edukasaun nu’udar instrumentu privilejiadu: nu’udar adultu iha foin-sa’e sira nia parte; forsa pró-ativa ambiente nian; dimensaun religioza ezisténsia nian.

## 2. Halo memória Valdocco nian nu’udar sujetan iha ita-nia knaar edukativu no pastorál ohin

Atu iha “fuan ororianu” ita buka filafali ba esperiénsia Valdocco nian atu ita bele kualifikasi no orienta ita-nia misaun iha edukasaun foin-sa’e sira-nian ba fiar. Halo nune’e ita kualifikasi Oratóriu no bele halibur sujetau sira ba dalan edukativu sira no pastorál.



Projetu fundamental Don Bosco nian mak projetu “relijiozu”, katak klamar nia salva-saun, hanesan nia rasik hateten. Se ita interpreta fali iha preokupasaun sira seluk nia roman, ne’e katak ita la tuir ona

eh trai ona ninia ezisténsia. Iha foin-sa’e konkretu sira nia oin ne’ebé DonBosco tau matan, ninia fuan amlulik nian nakonu ho atensaun ba sira-nia nesesidade loroloron nian. Tanba ne’e nia “reajen” ho interven-saun sira iha ámbitu sosiál no político. Iha tinan ikus sira nia moris nian, Don Bosco nia konxiénsia kona-ba rejenerasaun globál sosiedade Italiana nian (ne’ebé hadook an ho modu progresivu husi relijaun no valór sira) sai boot liután: ba rejenerasaun sosiedade nian, Don Bosco konsidera foin-sa’e sira nu’udar forsa rejeneradora, katak forsa ne’ebé fó moris foun. No nia tau esforsu no empeñu hotu ho laran-manas ba sira-nia edukasaun globál eh integrál.

Ne’e mak Don Bosco nia “paixaun”, ninia projetu moris nian: nia hakarak rejenera sosiedade ne’ebé nia moris bá no deside katak rejenerasaun sosiál ne’e liuhusi foin-sa’e sira no sira-nia kapasidade ba rejenerasaun. Tanba nia empeña an ho sira. Nia iha mehi boot kona-ba sira no imajina katak foin-sa’e sira iha kapasidade atu hafoun sosiedade.

Don Bosco mak konstrutór boot obra edukativa sira ba foin-sa’e sira. Nia halo obra sira-ne’e atu hasai sira husi lurón, atu asegura esperiénsia kreiximentu nian, habiit sira ba profisaun ida ne’ebé bele asegura sira ba futuru. Rezultadu ba ninia barani ne’e halekar ho lais iha mundu.

“Fuan oratorianu” empeña ita atu harii fatin sira iha-ne’ebé bele esperimenta ho modu konkretu esperansa iha futuru. Fatin sira-ne’e mak fatin iha-ne’ebé bele dada iis esperansa, korajen atu enfrenta kestaun sira moris loroloron nian ho modalidade alternativa ba modalidade dominante sira eh modalidade sira ohin loron nian.

Ba ne’e presiza hetan edukadór/a sira ho “fuan oratorianu” tuir ida Don Bosco nian. Don Bosco haree katak nia labele halo buat hotu mesak, tanba ne’e mak nia “kria” kolaboradór sira, hodi selesiona sira no forma sira tuir ninia estilu. Bainhira nia haree katak la funsiona tuir nia hakaran, nia “foti sae” nia lian (Surat husi Roma 1884). Reflesaun kona-ba “fuan oratorianu” la’ós uluknanai kona-ba estrutura sira, maibé refere liuliu ba edukadór/a sira ne’ebé kompromete an iha Oratório. Proposta sira tuirmai mak lista ida atitude nian ne’ebé presiza hanoin nu’udar sasukat atu ita sukat ita-nia an.

### 3. Dimensaun operativa sira “fuan oratorianu” nian

Informasaun sira ne’e bele tulun ita ho modu konkretu no verifika karakterística sira ne’ebé hilin eh opsaun atu servisu iha Oratório ho “fuan oratorianu” entrega mai ita.

Iha tradisaun saleziana “fuan oratorianu” hetan espresaun ho modu konkretu. “Fuan oratorianu” mak define Oratório no, instituisaun sira hotu ne’ebé hakarak halo Oratório nu’udar modelu ida inspirasaun nian.

Don Bosco moris esperiênsia pastorál típica ida iha ninia Oratório dahuluk, ne’ebé ba foin-sa’e sira sai “uma ne’ebé simu, parókia ne’ebé evanjeliza, eskola ne’ebé prepara ba vida no pátio atu hasoru malu ho belun loos sira no moris iha ksolok” (Konst.SDB art. 40).

Preokupasaun fundamentál mak enkontru



ho Jézús, maski ohin loron iha pluralizmu kulturál no inter-relijiozu... Lójika “fuan oratorianu” nian rejeita alternativa entre “konfsaun” [relijaun] no “neutralidade” Oratório nian, atu hili servisu ba moris no ba esperansa “nakonu” ba foin-sa’e sira.

Anúnsiu Evanjellu nian mak jestu ida domin nian, totalmente gratuito no radikalmente desentra an atu to’o bá ema seluk. Nia nunka bele sai proselitizmu ka buat ruma atu ha’u gaba an hanesan gaba ha’u-nia klub desportu nian.

Sei hala’o projeto edukaun nian iha fiar tuir lójika prosesu nian, hodi asegura ho modu kontemporáneu no komplementár: akollimentu inkondisionál ba foin-sa’e sira, atu halo sira kona ho liman katak sira simu “domin”; produsaun no esperiênsia modu moris nian alternativu ba ida ne’ebé ohin domina iha sosiedade, iha lójika Evanjellu nian: perdaun, prestíjiu, solidariedade, liberdade no responsabilidade, sentidu mistériu; espasu ida iha-ne’ebé “interese” konkretu sira (desporto, knananuk, enkontru...) sai esperiênsia “valór nian” no la instrumentaliza ba objetivu seluseluk, no rekoñese katak bele uza no esperimenta iha moris konkretu; proposta sarani ida (no ninia celebrasau sakramental no litúrjika) nu’udar liafoun-di’ak ba moris no esperansa. Hilin atu “fó proposta sira, hodi halo esperiênsia”, implika ezijénsia ne’ebé tanba “fuan oratorianu” ne’e, labele renunsia, tanba bele iha buat interesante atu komunika ba modelu hotu pastorál juvenil nian: husi neutralidade ba kapasidade pró-ativa ho empeñu; liuhusi dalan esperiênsia nian ida ne’ebé hatudu iha moris ho modu krítiku; hodi hakat fronteira sira hodi halo esperiênsia no produsaun cultura nian, esperiênsia no celebrasau fiar nian no konfronta an ho modelu sira referénsia nian.

(NPG)

# SURAT HUSI REITOR-MOR ba foin-sa'e sira

«Ha'u bele konfia ba imi buat ruma? Dalabarak, bainhira ha'u hasoru ho imi foin-sa'e sira husi parte oioin mundu nian no tenke dirije liafuan ba imi, ha'u hanoin kona-ba saida mak Don Bosco sei dehan ba imi hodi Jezús nia naran. Ha'u konxiente kona-ba diversidade boot ne'ebé iha entre imi tuir NASAUN no kontinente sira iha-ne'ebé imi moris bá; diversidade mós bazeia ba kultura, diversidade tuir tipu preparasaun nian ba vida, balun ho estudu formasaun profisionál nian eh kualifikasiacaun ba serbisu, balun liuhusi estudu universitáriu sira. Ha'u konxiente katak lahanesan situasaun husi sira ne'ebé iha rekursu umanu no ekonómiku sira atu dezenvolve talentu rasik, husi kondisaun sira ne'ebé menus iha oportunidade, nst. Maibé ha'u konvensidu katak imi-nia fuan foin-sa'e iha buat barak iha komún, ne'ebé to'o ba imi iha-ne'ebé imi horik bá.

Mensajen ne'ebé ohin ha'u haruka ba imi iha sintonia tomak ho buat ne'ebé Papa Francisco husu ba imi iha okaziaun oioin: "Foin-sa'e doben sira, ha'u iha konfiansa tomak iha imi no ha'u harohan ba imi. Imi iha korajen atu bá kontra korrente".

Iha adultu barak ne'ebé iha konfiansa tomak iha imi. Ha'u mak sira ne'e ida, ha'u-nia foin-sa'e doben sira, no ha'u konvida imi atu sai ema aten-brani iha imi-nia moris. Ha'u husu imi stu iha forsa atu bá "kontra korrente" bainhira nalian ho insisténsia iha imi-nia fuan nia laran bolun atu sai fiél ba an rasik no ba Jezús.

Ohin mundu presiza imi. Presiza ideál boboot sira ne'ebé próprio imi-nia juventude nian no imi-nia mehi juvenil nian. Ohin loron liufali uluk, mundu presiza foin-sa'e sira nakonu ho esperansa no aten-brani, ne'ebé la ta'uk atu moris, atu mehi, atu buka ksolok auténtiku no kle'an ne'ebé liuhusi nia Maromak horik iha imi-nia fuan. Foin-sa'e sira ne'ebé sente hakaran atu empeña an no iha kapasidade atu



kompromete an no hadomi "to'o terus", hanesan Madre Teresa de Calcutta hateten, ohin loron santa. Foin-sa'e sira ne'ebé, tan empeño iha kapasidade atu saran sira-nia tempu no saran mós sira-nia an rasik.

Maibé iha mós foin-sa'e barak ne'ebé "kolen, baruk eh iha deziluzaun", eh foin-sa'e sira ne'ebé nunka iha entuziazmu ba buat ida, foin-sa'e fraku sira no frajil. Foin-sa'e sira ne'ebé presiza foin-sa'e sira seluk, presiza imi, ne'ebé ko'alia kona-ba experiénsia no ho linguajen ida mai husi moris, hodi halo sira haree katak iha dalam seluk no posibilidade seluk. Foin-sa'e sira ne'ebé tulun aira atu comprende loloos katak halai husi dezafiu sira moris nian la'ós solusaun; foin-sa'e sira ne'ebé nu'udar dixípulu-misionáriu loloos, tulun sira deskobre Jezús iha sira-nia ezisténsia no fiar iha Nia. Jezús ida ne'ebé, naturalmente, "la fa'an iluzaun ba ó", maibé oferese Vida, ida auténtika, ida ninian; oferese nia An rasik.

Ha'u hanoin, ha'u-nia doben foin-sa'e sira katak...Don Bosco bele dehan buat ruma ba imi, ho liafuan no linguajen ohin nian, hanesan Amu-Papa dehan ba imi iha ninia surat: "Keta ta'uk... Mundu ida di'ak liu harii hodi imi mós, hodi imi nia hakaran ba mudansa no imi-nia laran-luak. Keta ta'uk atu rona Espíritu ne'ebé sujere hilin barani nian, no keta demora bainhira konxiénsia husu imi atu tuir Mestre".

Ha'u hakarak ho fuan tomak atu sai duni nune'e ba imi: katak imi iha kapasidade atu assume risku sira bainhira liga ho Jezús no Aman Maromak iha ita-nia moris. Ninia Prezensa sei la kuran iha imi liuhusi Espíritu no sei sai garantia segura ba imi-nia dalam umanu ksolok nian».

Ángel Fernández Artime, sdb  
Reitor-Mor

# Tatoli - Tatoli fiar

Jan-Mar 24

ITA-NIA MORIS SARANI



# FIAR, DIXERNIMENTU, VOKASAUN

Iha tinan 2018 sei iha Sínodu ho tema “Foin-sa’ e sira, fiar no dixernimentu”. Sínodu ne’ e iha finalidade atu identifika modalidade sira ne’ebé di’ak liu atu akompaña foin-sa’ e sira, atu rekoñese no hakohak bolun ba moris nakonu no atu haklaken Evanjellu ba sira ho modu efikás. Iha fulan Janeiru liubá, sai tiha ona Dokumentu Preparatóriu fahe ba parte tolu: dahuluk kona-ba rona realidade, daruak fó hanoin kona-ba importânsia dixernimentu nian, datoluk foka kona-ba asaun pastorál iha komunidade ekleziál. Kreda hakarak akompaña foin-sa’ e sira atu deskobre no realiza sira-nia vokasaun.

*Iha-ne’ e apresenta parte datoluk dokumentu nian.*



Liuhusi perkursu Sínodu ne’ e nian, Igreja hakarak tenik fali ninia dezeju atu hasoru, akompaña no tau matan ba joven ida-idak, lahó exesaun. Nune’ e, ita labele mós abandona sira ba forma sira solidaun nian no ezkluzaun nian ne’ebé mundu espoín sira bá. Atu sira nia moris sai esperiênsia di’ak, atu sira la lakon tuir dalañ violénsia eh mate nian, atu deziluzaun la dadur sira iha aliena-saun: buat sira-ne’ e hotu tenke sai atensaun boot ba ema hotu ne’ebé moris ba vida no ba fiar, konxiente katak sira simu don boot ida. Ho prezente ida-ne’ e, ita hatene katak mai iha mundu signifika hetan promesa ba moris di’ak no katak ema simu nia no proteje nia mak esperiênsia orijinária ne’ebé hakerek iha ema ida-idak konfiansa katak sei la abndona nia ba moris lahó sentidu, lae mós ba nakukun mate nian, no iha esperansa katak

nia bele manifesta ninia orijinalidade iha dalan ida ba moris nakonu.

Sabedoria Igreja orientál nian tulun ita atu deskobre oinsá konfiansa ida-ne’ e soi nia abut iha esperiênsia «moris tolu» [nascimento]: moris naturál, nu’udar feto eh mane, iha mundu ida ne’ebé bele simu no promove vida; moris batizmu nian, «bainhira ema ida sai Maromak nia oan liuhusi grasa»; no tuirmai moris datoluk, bainhira verifica pasajen «husi forma vida korporál ba ida espirituál», ne’ebé loke ba ezersísiu tasak liberdade nian (cf. Discursos de Filoxeno de Mabug, bispo sírio do século V, n. 9).

Oferese ba ema seluk don ne’ebé ita rasik simu signifika akompaña sira tuir dalañ ne’ e, iha sira-nia sorin iha aprosimasaun ba sira nia frajilidade rasik no difikuldade sira moris nian, maibé liului hodi haburas liber-



dade sira ne'ebé harii daudaun hela. Kona-ba ne'e, Igreja, hahú husi ninia Bibi-Atan sira, simu bolun atu kestiona an no deskobre hikas ninia vokasaun ba atensaun, ho estilu ne'ebé Papa Francisco fó hanoin iha inísiu ninia pontifikadu: «tau-matan, bali, husu laran-di'ak, husu atu pratika ho ternura. Iha Evanjellu sira, S. José mosu nu'udar mane forte, aten-brani, serbisu-dór ida, maibé iha ninia laran hatudu maka'as ternura boot ida, ne'ebé la'ós virtue ema fraku sira-nian; iha kontráriu, nia hatudu fortaleza espíritu nian no kapasidade ba atensaun, kompaixaun, abertura loos ba ema seluk, kapasidade ba domin» (Homilia por ocasião do início do ministério petrino, 19 de março de 2013).

Iha perspetiva ida-ne'e, agora sei apresenta konsiderasaun ruma atu bele halo akompañamentu ba joven sira no hahú husi fiar, hodi rona Igreja nia tradisaun no ho objetivu klaru atu asiste sira iha sira-nia dixernimentu vokasionál no iha asunsaun hilin fundamen-tál sira moris nian, ho konxiénsia kona-ba karakter irreversivel ruma.

## 1. Fiar no vokasaun

imi nia fuan hela ba nafatin, nune'e buat hotu ne'ebé imi husu ba Aman hodi Ha'u naran, Nia sei haraik ba imi. Ha'u haruka imi: hadomi malu» (Jo 15, 16-17). Se vokasaun ba ksolok domin nian mak apelu fundamen-tál ne'ebé Maromak hakerek iha joven ida-idak ninia fuan, atu ninia esperiénsia bele fó fuan, fiar mak don ida husi leten no, tempu hanesan, resposta bainhira sente katak ema fihir no hadomi nia.

Fiar «la'ós fatin-subar ba ema lahó korajen, maibé dilatasau moris nian: halo deskobre bolun boot ida — vokasaun ba domin — no assegura katak domin ne'e bele konfia, katak soi duni atu entrega an ba nia, tanba ninia fundamentu mak Maromak nia fidelidade, ne'ebé forte liu duké ita-nia frajilidade hotu» (Lumen fidei, 53). Fiar ida-ne'e «sai naro-man atu leno relasaun sosiál hotu», hodi kon-tribui atu harii fraternidade universál entre mane no fetu sira tempu hotu nian (ibid., 54). Bíblia apresenta narrasaun wain vokasaun no resposta joven sira-nian. Iha fiar nia ro-man, sira foti konxiénsia gradualmente kona-ba projetu domin apaixonadu ne'ebé Maromak iha ba sira ida-idak. Ida-ne'e mak intensaun husi Maromak nia asaun ida-idak, hahú husi mundu nia kriasaun nu'udar fatin «di'ak», ne'ebé bele simu moris, no oferece forma don nian nu'udar tesedura relasaun sira-nian ne'ebé bele konfia bá.

Fiar signifika koloka an atu rona Espírito no diálogu ho Liafuan, katak dalan, lia-loos no moris (cf. Jo14, 6), ho intelijénsia no afetividade rasik, aprende fó konfiansa ba nia «hodi hola isin» iha realidade moris loroloron nian, iha momentu sira iha-ne'ebe krús besik no iha momentu sira ne'ebé koko ksolok iha sinál moris-hi'as nia oin, hanesan buat ne'ebé «eskolante Na'i hadomii» halo. Ida-ne'e mak dezafiu ne'ebé interpela komuni-dade sarani no ho modu partikulár sarani ida-idak.

Espasu ba diálogu ida-ne'e mak konxiénsia. Hanesan Konsíliu Vaticano II hanorin, nia «mak sentru sekretu liu no ema nia san-tuáriu, iha-ne'ebe nia hasoru malu mesak de'it ho Maromak, no halo ita rona nialian iha intimidade an rasik nian» (Gaudium et

«La'ós imi mak fihir Ha'u, maibé Ha'u mak fihir imi, hodi haruka imi bá atu fó fuan, no

spes, 16). Tanba ne'e, konxiénsia mak espasu inviolável iha-ne'ebé manifesta konvite atu aseita promesa ida. Distinge Espíritu nia lian husi apelu sira seluk no deside resposta sá loos atu fó mak knaar ida ne'ebé compete ba ema ida-idak: ema seluk bele akompañnia no konfirma nia, maibé nunka troka nia. Vida no istória hanorin ita katak ba kriatura ema la'ós nafatin fasil atu rekoñese forma konkreta ksolok nian ne'ebé Maromak bolu nia no iha-ne'ebé ninia hakarak buka, menus liután ohin, iha kontestu ida mudansa no inserteza nian. Dala ruma ema tenke luta contra dezenkorajamentu eh kontra forsa sira apegue seluk nian, ne'ebé impede iha ninia korrida ba plenitude: ne'e mak esperiénsia ema barak nian, porezemplu joven ne'ebé iha soin barak atu sai livre atu aseita Jezús nia bolun no, tanba ne'e, nia bá ho laran triste no la nakonu ho ksolok (kf. Mc 10, 17-22). Maski nia iha nesesidade atu purifika an no livre husi impedimentu, ema nia liberdade nunka lakon totalmente ninia kapasidade radikál atu rekoñese di'ak no pratika: «Kriatura ema sira, ho kapasidade atu kona degradasaunaat liu, sira mós bele supera an, fila fali atu hili di'ak no hadi'ak an, hakat liu kondisionamentu psikolójiku no sosiál hotu ne'ebé impoin ba nia» (Laudato Si', 205).

## 2. Don dixernimentu nian

Foti desizaun no orienta asaun pesoál hotu iha situasaun sira inserteza nian no iha impulsu interiór kontrastante oioin mak ámbitu atu ezerse dixernimentu. Dixernimentu mak liafan klásiku ida tradisaun Igreja nian, ne'ebé aplika ba pluralidade situasaun nian. Defaktu, eziste dixernimentu sinál sira tempu nian, ne'ebé haka'as an iha rekoñesimantu kona-ba Espíritu nia prezensa no asaun iha istória; dixernimentu morál, ne'ebé distinge buat di'ak husi buat aat; dixernimentu espirituál, ne'ebé propoin atu rekoñese tentasaun atu rejeita no, iha kontráriu, bá oin iha dalan plenitude moris nian. Trama entre interpretasaun oioin sira-ne'e evidente no nunka konsege kore kompletamente.

Ho hanoin ida-ne'e, iha ne'e ita konsentra

iha dixernimentu vokasionál, katak prosesu iha-ne'ebé ema, iha diálogu ho Na'i no hodi rona Espíritu nia lian, halo opsaun fundamental sira, hahú husi estadu moris nian. Se interrogasaun kona-ba oinsá modu atu la soe leet de'it oportunidade sira realizaun pesoál nian kona mane no fetu hotu, ba fiar-na'in ida pergunta sai intensa no kle'an liut'an. Oinsá moris Liafoun-Di'ak Evangelu nian no hatán ba bolun ne'ebé Na'i dirije ba ema hotu ne'ebé nia sei hasoru: liuhusi kazamento, ministériu ordenadu, vida consagrada? No sá loos kampu atu bele halo talentu pesoál sira fó fuan: vida profisionál, voluntariadu, servisu ba ema ki'ik liu, compromisu iha política?

Espíritu ko'alia no atua liuhusi akontesimentu sira iha ema ida-idak nia moris, maibé eventu sira mumun no ambíguu, basá ema bele interpreta iha modu lahanesan. Leno ninia signifikadu atu to'o ba desizaun ida ezije perkursu ida dixernimentu nian. Verbu tolu ne'ebé Evangelli Gaudium, 52 uza atu deskreve dixernimentu – rekoñese, interpreta, hili – bele tulun ita delinea itineráriu adekuadu ida ba indivíduo nune'e mós ba grupu sira no komunidade sira, konxiente katak iha práctica baliza entre faze ida ho seluk nunka hatudu ho modu klaru.

## Rekoñese

Rekoñesimentu uluknai dehan kona-ba efeitu sira ne'ebé akontesimentu sira ha'unia moris nian, ema sira ne'ebé ha'u hasoru, liafan sira ne'ebé ha'u rona eh lee prodús iha ha'u-nia interioridade: variedade ida «dezeju sira-nian, sentimentu sira-nian, emosaun sira-nian» (Amoris laetitia, 143) ho natureza diferente liu: tristeza, nakukun, plenitude, ta'uk, ksolok, paz, sensasaun mamuk, ternura, laran-nakali, esperansa, laran-malirin, nst. Ha'u sente atrasaun eh impulsu ba diresaun oioin, no la iha ida ne'ebé ha'u haree momoos katak ha'u tenke tui; ne'e mak momentu aas no kraik sira, no iha kazu ruma sai nu'udar luta interór auténtika. Rekoñese rekere atu lori ba li'ur rikeza emosionál ida-ne'e no temi paixaun

sira-ne'e nia naran, maibé hodi la julga. Ezije mós atu sente «gostu» ne'ebé sira husik hela, katak, konsonánsia eh disónánsia entre buat ne'ebé ha'u esperimenta no buat ne'ebé eziste kle'an liu iha ha'u.

Iha faze ida-ne'e Maromak nia Liafuan hatais importánsia boot: ho efeitu, medita nia tau iha movimentu paixaun sira, nune'e mós esperiénsia sira hotu kontaktu nian ho interioridade rasik, maibé tempu hanesan ofere se possibilidade ida atu halo nia sobresai, hodi identifika sira iha eventu oioin ne'ebé nia haktuir. Faze rekoñesimentu nian tau iha sentru kapasidade rona nian no ema nia afe-tividade, hodi la hasees an tanba ta'uk kolen silénsiu nian. Ida-ne'e pasajen fundamental ida iha perkursu maturidade pesoál, ho modu partikulár ba joven sira ne'ebé esperimenta ho intensidade boot forsa dezeju sira-nian no bele sente mós hakfodak iha buat sira-ne'e nia oin, karik hodi renunsia ba ain-hakat boot sira ne'ebé dudu sira.

### *Interpreta*

La suficiente atu rekoñese buat ne'ebé ita esperimenta: presiza «xinterpreta nia» eh, ho liafuan seluk, comprende ba ne'ebé mak Espíritu bolu ita liuhusi buat ne'ebé nia hamo-su iha ita ida-idak. Dala barak ita para de'it atu dehan sai esperiénsia ida, hodi evidensia katak «ita impresionadu liu». Buat ne'ebé difisil liu mak komprende dezeju no emosaun siira ne'ebé sente nia orijen no signifikadu sira no avalia se sira lori ita ba diresaun konstrutiva ida eh, iha kontráriu, lori ita atu taka iha an rasik.

Faze interpretasaun nian ida-ne'e delikada liu; eziej pasiénsia, vijilânsia no mós apre-ndizajen rumo. Ita tenke iha kapasidade atu sai siente kona-ba efeitu kondisionamentu sosiál no psikolójiku sira. Ida-ne'e husu atu tau iha kampu kbiit intelektuál rasik sira, maibé hodi la monu iha risku atu harii teoria abstrata sira kona-ba saida mak di'ak no furak atu halo: iha dixernimentu mós, «realidade boot liu ideia» (Evangelii gaudium, 231). Iha interpretasaun, ita labele deskuida konfrontu ho realidade no konsiderasaun ko-

na-ba possibilidade sira ne'ebé objetivamente ita iha dispozisaun.

Atu interpreta dezeju no impulsu interiór sira presiza konfronta an ho modu onestu, iha Maromak nia Liafuan nia roman, ho ezi-jénsia morál vida sarani nian mós, hodi buka hatama nafatin sira iha situaun konkreta moris nian. Esforsu ida-ne'e dudu ema ne'ebé haka'as an atu keta haksolok ho lójika legalista ho mínimu indispensável, hodi buka iha kontráriu modu atu valoriza di'ak liután don pesoál sira no possibilidade rasik: tanba ne'e, ida-ne'e mak proposta atraente no estimulante ida ba joven sira.

Serbisu interpretasaun nian ida-ne'e realiza iha diálogu interiór ho Na'i, hodi ativa kapasidade hotu ema nian; maski nune'e, espesialista ida nia tulun iha raronak Espíritu nian konstitui apoiu folin liu, ne'ebé Igreja oferese no ladún prudente atu la uza tulun ne'e.

### *Hili*

Rekoñese no interpreta tiha mundu dezeju no paixaun nian, hahalok atu deside sai ezesísiu auténtiku liberdade humana no responsabilidade pesoál nian, konserteza nafatin tau iha situaun no nune'e limitada. Tanba ne'e mak hasai tiha hilin husi forsa instintu nian ne'ebé delek, iha-ne'ebé relativizmu kontemporáneu atribui papél kritériu ikus nian, hodi dadur ema iha ninia inkonstânsia. Tempu hanesan, liberta nia husi sujeisaun ba buat sira mai husi li'ur nune'e eterónoma, maski nune'e eziej koerénsia moris nian.

Durante tempu barak, iha istória, desizaun fundamental sira moris nian la'ós parte sira ne'ebé iha interesse diretamente mak foti; iha rejiaun balun mundu nian nune'e duni, hanesan hateten ona. Promove hilin ne'ebé tebes duni livre no responsavel, hodi hamamuk an husi konvivénsia ho legadu sira tempu uluk nian, mak nafatin sai objetivu ba pastorál vokasional naran de'it ne'ebé séria. Dixernimentu no ninia instrumentu prinsipál, ne'ebé permiti atu proteje espasu inviolável konxiénsia nian, hodi la pretende troka nia (kf. Amoris laetitia, 37).

Presiza tau desizaun sira ba prova akon-

tesimentu sira-nian, ho finalidade ba konfirmasaun. Hilin labele hela dadur iha interioridade ida ne'ebé iha risku atu permanese virtuál ka irrealista – perigu ida ne'ebé sai forte liután iha kultura kontemporánea – maibé simu bolun atu tradús iha asaun, hola isin, fó inísiu ba dalan ida, hodi aseita risku atu konfronta ho realidade ne'ebé tau dezejú sira no emosaun sira iha movimentu. Iha faze ida-ne'e sei mosu seluk tan: rekoñese sira no interpreta sira permiti atu konfirma desizaun ne'ebé foti ona ninia di'ak eh fó konsellu atu haree filafali. Tanba ne'e, importante «sai» mós husi ta'uk atu sala ne'ebé, hanesan ita haree, bele sai paralizante.

### 3. Dalan vokasaun no misaun nian

Dixernimentu vokasionál la sai kompletu ho halaholok ida de'it, maski iha istória vokasaun nian bele identifika momentu eh enkontru desizivu sira. Ho realidade importante hotu moris nian, dixernimentu vokasionál mós prosesu naruk ida, ne'ebé dezenvolve iha tempu, no durante ne'e presiza kontinua atu tau atensaun kona-ba indikasaun sira ne'ebé Na'i determina no espesifika vokasaun ida, ne'ebé prinsipalmente vokasaun ida pesoál no irrepetível. Na'i husu ba Abraão no Sara atu bá, maibé iha dalan progressivu de'it no lae mós hodi la halo ain-hakat falsu sira mak sai klaru buat ne'ebé insialmente mistériu ida «rai ne'ebé Ha'u sei hatudu» (Gn 12, 1). Maria rasik halo progresu kona-ba konxiénzia ninia vokasaun nian liuhusi meditasaun liafuan sira ne'ebé nia rona no eventu sira ne'ebé akontese ba nia, inklui buat sira ne'ebé nia la komprende (kf. Lc 2, 50-51). Tempu mak fundamental atu verifika orientasaun efetiva ba desizaun ne'ebé foti. Hanesan pájina ida-idak testu bíbliku hanorin, la eziste vokasaun ne'ebé la'ós ba finalidade misaun ida simu ho laran taridu eh ho entuziazmu.

Aseita misaun implika disponibilidade atu tau iha risku moris rasik no tuir dalan krús nian, iha Jezús nia ain-fatin ne'ebé, ho determinasaun, la'o tuir dalan ba Jerusalém (kf. Lc 9, 51) atu entrega nia moris rasik ba umani-

dade. Ema ne'ebé renunsia atu okupa sentru palku nian ho ninia nesesidade sira mak ba nia sei loke espasu atu simu Maromak nia projetu nona-ba vida familiár, ministériu ordenadu eh vida konsagrada, nune'e mós atu dezempeña ho ezatidaun profisaun rasik no buka ho sinseridade di'ak komún. Ho modu partikulár iha fatin sira ne'ebé kultura marka maka'as ho individualizmu, presiza verifika oinsá mak hilin sira ne'e karik mai husi hakaran auto-realizasaun narsisista ba an rasik no, iha kontráriu, oinsá hilin sira iha kbiti atu abranje disponibilidade atu moris ezisténsia pesoál iha lójika don laran-luak an rasik nian. Tanba ne'e mak kontaktu ho pobreza, ho frakeza no karénsia soi importânsia boot ida iha dalan dixernimentu vokasionál. Refere ba bibi-atan sira abanbairua nian, oportunu uluknanai avalia no promove kreximentu iha disponibilidade atu husik sira an nakonu ho «bibi sira nia iis».

### 4. Akompañamentu

Iha dixernimentu nia baze ita bele hetan konviksaun tolu, ho abut metin iha kriatura ema ida-idak nia esperiênsia, lee filafali iha fiar no tradisaun sarani nia roman. Ida uluk mak Maromak nia Espíritu atua iha mane no feto ida-idak nia fuan, liuhusi sentimentu no dezejú sira ne'ebé kesi an ba ideia sira, imagen sira no projeto sira. Hodi rona ho atensaun, kriatura ema iha possibilidade atu interpreta sinál sira-ne'e. Konviksaun daruak mak ema nia fuan, tanba ninia frajilidade no ninia salan, normalmente apresenta an nu'udar fuan ne'ebé fahe tanba sente atrasaun ba apelu oioin eh kontra malu. Konviksaun datoluk mak, maski nune'e, dalan moris nian obriga atu deside, basá ita labele hela nafatin iha indeterminasaun. Nune'e, presiza iha instrumentu sira atu rekoñese Na'i nia bolun ba ksolok domin nian no deside fó resposta ida ba nia.

Entre instrumentu sira, tradisaun espirituál tau iha evidénsia importânsia akompañamentu pesoál. Atu akompaña ema seluk, la'ós suficiente estuda teoria dixernimentu nian; presiza moris iha kulit rasik esperiênsia

atu interpreta movimentu sira fuan nian atu iha sira rekoñese Espíritu nia asaun, ne'ebé nia lian hatene ko'alía ba ema ida-idak nia singularidade. Akompañamentu pesoál husu atu halo kro'at nafatin sensibilidade rasik ba Espíritu nia lian, hodi lori atu deskobre iha partikularidade pesoál sira rekursu ida no rikusoin ida.

Ne'e katak favorese relasaun entre ema no Na'i, hodi kolabora atu hasai buat ne'ebé impede nia. Ne'e mak diferença entre akompañamentu ho finalidade dixernimentu no apoiu psicolójiku, ne'ebé se karik, nakloke nafatin ba tranxendénsia, sei revela ho frekuénsia ninia importânsia fundamental. Psikólogu apoia ema ida ho difikuldade, hodi ajuda atu foti konxiénsia kona-ba frajilidade no potencialidade rasik; gia espirituál hameno ema ba Na'i no prepara rai ba enkontru ho Nia (kf. Jo 3, 29-30).

Testu evanjéliku sira ne'ebé haktuir Jezús nia enkontru ho ema sira nia tempu nian tau iha evidénsia elementu rumá ne'ebé tulun ita atu trasa perfil ideál ema ne'ebé akompañá joven iha dixernimentu vokasional: hateken domin nian (vokasaun dixípulu dahuluk sira-nian, kf. Jo 1, 35-51); liafan autorizada (hanorin iha sinagoga Cafarnaum nian, kf. Lc 4, 32); kapasidade atu «sai maluk» (ai-knanoik samaritanu di'ak nian, kf. Lc 10, 25-37); hilin atu «la'o iha sorin» (eskolante Emaús nian, kf. Lc 24, 13-35); no sasin autentisidade nian, lahó ta'uk atu bá kontra prekonseitu sira ne'ebé habelar liu (fase-ain iha han-kalan ikus, kf. Jo 13, 1-20).

Iha kompromisu akompañamentu nian ba jerasaun joven sira, Igreja simu ninia bolun atu kolabora ba joven sira nia ksolok, en vezde buka atu posui sira-nia fier (kf. 2 Cor 1, 24). Servisu ne'e, ho modu definitivu, tau abut iha orasaun no iha pedidu don Espíritu nian atu gia no leno hotu-hotu no ida-idak.


(Tradusaun - JG)

~~~~~\*\*\*~~~~~

## LITURJIA EUKARÍSTIKA NO PRÁTIKA SIRA HALA'O IHA ITA-NIA RAIN

*Ko'alía kona-ba práтика litúrjika sira hala'o iha ita-nia Rain, "hanesan ita hateke ba lalenok atu konfronta an. Iha regra maibé ita sai husi regra.*

*Ezersísiu di'ak atu ita hatene konfronta ita-nia an hodi haree iha-ne'ebé mak ita tuir orientasaun no iha ne'ebé mak la tuir". Buat ne'ebé importante mak halo dalan, no atu halo mudansa ida sempre "lori tempu", maibé "mantein nafatin iha salan katak estupidés" no se ita hakarak muda no korrije ita-nia salan sira mak "sinál intelijénsia" nian.*



### Eukaristia nia natureza sakramental

Eukaristia mak hun no tutun moris sarani to-mak nian (LG 11), basá Eukaristia mak sakramento ne'ebé halo sai prezente, iha celebraisaun litúrjika Kreda nian, Jezús Kristu nia An rasik no ninia sakrifisiu makso'in, iha plenitude Mistériu Paskál ninia terus, mate no morishiás. Ninia prezensa mak prezensa ativa, tanba Na'i sai prezente ho dinamizmu domin salvífiku: iha Eukaristia Nia konvida ita atu simu salvasaun ne'ebé Nia oferese mai ita no simu don ninia Isin no Raan nu'udar ai-han ba moris rohan-laek, hodi tama iha komuñaun ho Nia no iha komuñaun ho membru hotu ninia 'Corpo Místico', katak Kreda. Iha Eukaristia "ita sai ida de'it ho liturjia lalehan nian" no sai ida de'it entre ita (Catecismo da Igreja Católica, 1326).

Defaktu, hanesan Konsíliu Vaticano II afirma,

«ita-nia Makso'in, iha Han-Kalan Ikus, iha kalan ne'ebé ema saran Nia, institui Sakrifisiu eukarístiku ninia Isin no Raan nian, atu perpetua iha tempu, to'o ninia fila hikas, sakrifisiu krús nian no atu entrega ba Kreda, ninia espoza doben, memoriál ninia mate no moris-hí'as: sakramentu piedade nian, sinál unidade nian, talin karidade nian, bankete paskál iha-ne'ebé simu Kristu, klamar sai nakonu ho grasa no simu peñór glória futura» (SC 47).

### Naran sira Sakramentu Eukaristia nian

Eukaristia, simu naran oioin husi Sagrada Eskritura nune'e mós husi Tradisaun Kreda nian, atu hatudu aspetu oioin sakramentu ida-ne'e nian ne'ebé riku tebes maibé termu sira-ne'e la taka ninia signifikadu hotu:

- Balun fó hanoin orijen ritu nian: Eukaristia, Silu-fahe Paun, Memoriál terus, mate no moris-hí'as Na'i nian, Na'i nia Han-Kalan.
- Balun subliña karakter sakrifisiu Eukaristia nian: Santu Sakrifisiu, Sakrifisiu Santu Missa nian, Sakramentu Altár nian, Óstia (= Vítima imolada).
- Balun buka esprime realidade Kristu nia prezensa iha espésia konsagrada sira: Sakramentu Kristu nia Isin no Raan, Paun Lalehan nian (kf. Jo 6,32-35; Jo 6,51-58), Santíssimu Sakramentu (tanba soi Maromak ne'ebé halo an ba ema nia santidade rasik).
- Balun refere ba efeitu ne'ebé mai husi Eukaristia iha sarani ida-idak no Kreda tomak: Paun Moris nian, Paun oan sira-nian, Kálix salvasaun nian, Viátiku (atu la lakon dalan loos), Komuñaun. Naran ida ikus ne'e atu hatudu katak liuhusi sai ida de'it ho Kristu (komuñaun pesoál ho Jézus Kristu) no ho membru hotu ninia 'Corpo Místico' (komuñaun ekleziál, iha Jézus Kristu).
- Naran ida mak asembleia eukarística («sýnaxis»), tanba celebra Eukaristia iha asembleia sarani sira nian, espresanu vizivel Kreda nian (kf. 1 Cor 11,17-34).
- Balun hanaran celebraun eukarística tomak ho termu ne'ebé, iha ritu latin, indika enviu sarani sira-nian depoizde komuñaun, *missio*: Missa, Santa Missa.

### Importânsia celebraun eukarística nian

Santa Missa mak renovasaun sakrifisiu úniku

no eternu Na'i nian. Celebraun Missa nian nu'udar Kristu nia asaun no Maromak nia povu nian mak sentru moris sarani tomak nian, basá ne'e mak tutun asaun Maromak nian atu santifika mundu iha Kristu, no kultu ne'ebé ema oferece ba Maromak. Tanba ne'e mak Kreda fó orientasaun sira atu ordena celebraun litúrgika sira, liuliu celebraun Eukaristia nian.

**Movimentu prioritáriu** eh diresaun Missa nian mak vertikál, iha diresaun ba Maromak, la'ós orizontál, eh iha diresaun ba ema. Tanba ne'e mak, tenke iha kuidadu atu prepara didi'ak celebraun ida-idak, celebraun ida nakonu ho fiar. *"Testu sira atu lee eh proklama tenke prepara ho tempu suficiente. Vestimenta no asesóriu hotu no mobiliáriu sira altár nian tenke iha estadu di'ak. Ema ne'ebé ezerse knaar amlulik celebrante, servidór/a altár sira, líder kantu nian, leitor sira, nst., tenke fó buat ne'ebé di'ak liu husi sira. Omilia tenke fó ai-han litúrgiku, teolójiku no espirituál ne'ebé sólidu"* (Kardeál Francis Arinze).

### Selebra ho modu ativu no frutuozu

Bispu diosezanu mak dispenseiru prinsipál mistériu sira Maromak nian iha Kreda partikular ne'ebé konfia ba nia, nia mak moderadór, promotór no mahein vida litúrgika tomak nian. Iha celebraun sira ne'ebé nia mak prezide, liuliu celebraun eukarística ne'ebé nia realiza, ho partisipasaun presbiteriu nian, diákonu sira no povu, manifesta mistériu Kreda nian. Tanba ne'e mak celebraun Missa sira-ne'e tenke konsidera nu'udar modelu ba dioseze tomak. Ninia devér esforsa an atu presbiteru sira, diákonu sira no sarani leigu sira comprende ho modu kle'an ba beibeik ritu sira no testu litúrgiku sira nia sentidu auténtiku no nune'e sira to'o ba celebraun ativa no frutuoza Eukaristia nian.

### Manifestasaun Kreda Universál

“Instrução Geral di Missal Romano” (IGMR) iha kapitulu IV, molok ko'alia kona-ba forma oioin Missa nian, temi iha fatin dahuluk kona-ba Missa ne'ebé Bispu mak prezide ho ninia presbiteriu, diákonu, ministru sira no povu, tanba ninia signifikadu nu'udar manifestasaun prinsipál Kreda nian. Iha Missa ne'e tenke tuir sermoniál Bispu sira-nian. Daruak, iha Missa

komunidade nian, liulu komunidade parokiál ne'ebé reprezenta Kreda universál iha fatin no tempu determinadu ida. Hafoin, ita iha mós Missa selebra iha komunidade oioin nian no ida-ne'ebé okupa fatin relevu nian mak Missa konventuál eh Missa Komunidade nian, ne'ebé halo parte 'Ofisiu loroloron nian' no tenke iha partisipasaun tomak no ativa membru sira hotu komunidade nian.

### Forma oioin selebra Missa

Forma oioin Missa nian mak Missa ho Povu, ne'ebé iha diákonu no lahó diákonu, Missa Konselebrada no Missa ho Ministru ida de'it. Missa ho Povu katak Missa ho sarani sira-nia partisipasaun iha loron domingu no festa ukun-fuan nian. Missa Konselebrada iha-ne'ebé hatudu unidade saserdósiu no sakrifisiu no unidade Maromak nia povu nian, tuir ritu halo iha ordenasaun Bispu no amlulik sira-nian, iha bensan Abade nian no Missa krízmál. Missa ho Ministru ida de'it nia assisténsia mak Missa amlulik ho ministru ida de'it, bele diákonu, no bele leigu.

#### Atensaun:

"Konversa, taratu, ajitasaun, dansa sira... la iha buat sira-ne'e ida mak kombina ho Missa. Konserteza iha fatin no sirkunstánsia propísia sira atu fakar sai ksolok sai sarani nian. Iha Missa, vale "regra osan-mean": buat ne'ebé la apropiadu atu halo iha Kalváriu, la apropiadu atu halo iha Missa.

Ita iha Maromak nia Oan-Mane nia sakrifisiu nia oin! Iha altár, Jezús oferece An ba Aman nu'udar vítima, tanba ita-nia salan sira. Tanba ne'e, ko'alia ho viziñu, atende bolun selulár nian, basa liman eh halo dansa, buat sira-ne'e ida la próprio iha Missa. Tipu atitude hanesan ne'e ita bele mós hanaran hahalok aat no profanu iha celebraus renovasaun sakrifisiu kalváriu nian "(Kard. Arinze).

### ESTRUTURA LITURJIA EUKARISTIA NIAN

Estrutura fundamental konsiste iha parte rua: **liturjia Liafuan** nian no **liturjia eukarística**, ne'ebé liga metin ba malu nu'udar hahalok kultu ida de'it; iha Missa iha meza Maromak nia liafuan nian atu sarani sira simu hanorin no

meza Kristu nia Isin nian atu sarani sira simu ai-han. Iha mós ritu sira hahú no taká nian ne'ebé bele troka ho serimónia seluk hanesan akontese iha Domingu Ramus no Kinta Santa.

### 1. RITU INISIÁL SIRA

Ritu sira molok (Kf. IGMR, 46-54, 120-127) liturjia liafuan nian mak entrada, saudasaun, 'acto penitencial', Kýrie, Glória no orasaun 'colecta' – iha marka konvite, introdusaun no preparasaun nian. Ninia finalidade mak estabelese komuñaun entre sarani sira no prepara sira atu rona Maromak nia Liafuan no celebra Eukaristia ho modu dignu.

#### Observasaun ruma:

- "Iha celebraus sakramentu sira-nian, tenke tuir fielmente livru litúrjiku sira ne'ebé aprova du husi autoridade kompetente; nune'e, la iha ema ida aumenta, halakon eh altera buat ruma iha sira, hodi iniciativa rasik" (CDC, cân. 846 § 1). Relasiona ho abuzu sira ne'ebé mosu, Pe. Graciano husi parte direitu nian dehan: "Sakramentu ida atu válido tenke iha matéria, forma no ministru ne'ebé válido. Ida nee mak sai nu'udar kritériu hodi prosessa ba tribunal ekleziástika".
- Celebraus hahú ho ritu prosisaun no se lori ho Maromak nia Liafuan sei uza de'it "Evangelíario", la'ós 'lecionário', no se la iha diákonu, leitor ho hatais dignu, mak sei lori hodi hasae aas uitoan no ba hatuur iha altár.
- Bainhira Missa hahú ona, la iha amlulik ida, iha kazu naran de'it, bá hamutuk eh admitidu atu konselebra (IGMR, 206).
- Se iha kantu entrada nian, amlulik la lee ona antífona entrada nian.
- Komentáriu sira la nesesáriu; celebrante bele fó liafuan badak/breve iha introdusaun eh ho saudasaun.
- Labele troka liafuan sira iha fórmula Kyrie nian, Glória nian, Credo, Sanctus no Ami Aman nian ne'ebé aprova ba uzu litúrjiku. Abuzu ne'ebé akontese beibeik mak koru uza hananu sira ne'ebé iha liafuan la hanesan ho ida iha Missal.
- Halo sinál krús ho modu korretu, tanba Missa mak sakrfisiu krús nian.
- Iha Missa atu halo sinál krús iha inísiu, no iha bensan finál, la halo bainhira komunga, depois komunga...

• Iha orasaun ‘Colecta’, amlulik depoizde konvida sarani sira ho laifuan “Ita harohan”, sei fó momentu silénsiu ida atu amlulik no sarani sira “hola konxiénsia katak sira iha Maromak nia prezensa no bele formula interiormente sira-nia intensaun sira” (IGMR, 54).

## 2. LITURJIA LIAFUAN NIAN

Parte prinsipál liturjia Liafuan nian mak leitura sira husi Sagrada Eskritura interkala ho knananuk Salmu responsoriál no aklamasaua ba Evanjellu. Omilia nu’udar komentáriu ba leitura sira ne’ebé ministru ordenadu de’it mak bele halo, tenke sai ai-han espirituál attu haburas vida sarani. Povu adere ba Maromak nia liafuan ho profisaun fiar nian eh ‘Credo’. Ho kbit ne’e, nia hasae orasaun universál ba Kreda nia nesesidade hotu no ba mundu tomak nia salvasaun.

### Observasaun ruma

- “Leccionário” eh “Missal” nia fatin iha altár molok selebrasaun, la’ós leitor lori bainhira nia ba lee.
- Bainhira leitura, sarani sira hotu see tilun attu rona, la’ós lee fali akompaña leitor iha sira-nia missal rasik.
- Leitor molok lee, liuhusi altár oin tenke venia ba altár, bele mós venia ba padre. Hafoin molok lee, tenke venia ba ambaun nu’udar fatin ba Maromak nia liafuan.
- Labele lee leitura sira husi surat-tahan maibé husi “lecciónário”.
- Salmu responsoriál labele troka ho hananu seluk ne’ebé diferente husi salmu loron nian, tanba salmu ne’e resposta ba leitura ne’ebé foin lee.
- Hananu salmu responsoriál ho lian ida de’it tanba ema hotu tenke kanta. Se hananu ho lian barak, muda fali ba momentu seluk, porezemplu ba entrada. Evita ritmu sira ne’ebé mak la ajuda situasaun. Kona ba nota sira, sei entrega ba seminarista sira.
- Diákonu eh amlulik sira ne’ebé atu lee Evanjellu, hakruuk de’it iha Selebrante prinsipál eh Bispu nia oin, la’ós hakne’ak mak husu bensan.
- Saudasaun “Maromak hela ho imi” molok lee Evanjellu, la halo ho liman nakloke, maibé ho liman tau hamutuk.
- Durante Evanjellu ita halo sinál krús iha

reen-toos, atu fó hanoin mai ita katak presiza koñese, es-tuda, comprende Evanjellu; sinál krús iha ibun, atu fó hanoin mai ita katak sarani hotu nia misaun mak haklaken Evanjellu; sinál krús iha peitu, iha fuan, ne’ebé hatudu mai ita katak, uluknanai ita ne’ebé fiar iha Kristu moris-hi’as presiza moris tuir Evanjellu, haklaken no fó sasin.

- Lee hotu tiha Evanjellu, amlulik rein Evanjellu no la foti sae livru mak dehan “Lia makso’in”.
- Se Bispu mak celebrante prinsipál, diákonu eh amlulik lee hotu tiha, sei lori ‘Evangelíario’ eh “lec-cionário” ba Bispu atu rein no sarani sira hamrik nafatin atu Bispu fó bensan ho ‘Evangelíario’ no koru akompaña ho hananu aklamasaua.
- Omilia mak knaar ministru ordenadu nian, maibé iha amlulik balun ne’ebé fó fali ba religioza/u eh leigu mak halo. Ne’e erru ida.
- Amlulik halo omilia ko’alia fali kona-ba política (dala ruma hirus sarani eh religioza sira). “Omilia iha fundamentu metin iha mistériu sira salvasaun nian, hodi esplika iha tinan litúrjiku tomak, husi testu leitura bíblika sira no testu litúrjiku sira, mistériu sira fiar nian no norma sira vida sarani nian bazeia ba leitura sira selebrasaun nian” (RS, 167).
- Husu mós atu tau atensaun atu keta hanaruk liu tempu omilia nian.
- Estrutura ba orasaun dos fiéis: 1) Ba igreja nia nesesidade sira, 2) ba autoridade sivil sira no mundu nia salvasaun, 3) ba sira ne’ebé terus, no 4) ba komunidade lokál prezente.

## 3. LITURJIA EUKARÍSTIKA NIAN

Liturjia eukarístika (IGMR 72-90, 139-165) konsiste esencialmente iha han-kalan sakrifisiu nian ne’ebé, liuhusi sinál paun no tua, reprezenta no perpetua iha altár, Na’i Jezús Kristu nia sakrifisiu paskál, ne’ebé Nia rasik haruka atu halo hodi hanoin Nia.

Igreja dispoín celebraun eukarístika tomak atu corresponde ho Kristu nia liafuan no jestu sira: iha preparasaun don sira nian lori ba altár paun no tua ho bee, katak elementu sira ne’ebé Kristu foti iha nia liman sira; iha orasaun eukarístika, ita fó grasa ba Maromak ba obra salvasaun tomak no oferenda sira nakfilak ba Kristu nia Isin no Raan; liuhusi silu paun no komuñaun sarani sira-nian, ita maski barak, simu Na’i nia Isin no Raan husi paun ida de’it

no kálix ida de'it.

### a. Preparasaun oferta nian

Amlulik prepara altár hodi tau korporál no misal ne'ebé akólitu sira lori husi 'credênciā'. Se karik iha prosisaun, hamutuk ho karan seluk, paun no tua de'it mak amlulik tau iha altár, hodi harohan tuir fórmula sira ne'ebé iha; amlulik bele insensa oferenda sira iha altár leten, hafoin krús no altár rasik. Hafoin amlulik fase liman, nu'udar ritu purifikasiasaun nian. Hotu tiha ritu sira, preparasaun oferta sira-nian, amlulik konvida sarani sira atu harohan ho nia. Sarani sira hamriik iha parte ne'e, remata ho orasaun ba oblatá sira, ne'ebé sarani hotu hatán ho aklamasaun 'Amen'.

### Kestaun práтика ruma

- Padre la fó bensan ba bee iha 'galheta' ne'ebé atu uza ba ofertóriu, basá la tama iha ritu.
- Kona-ba oferta seluk hanesan "osan": lolos tenke halo peditóriu iha momentu ofertóriu, nune'e mós lori ba altár iha momentu ofertóriu. Tanba ne'e presiza multiplika bornál eh fatin atu halo peditóriu.
- La iha dansa iha 'Rito Romano', nune'e la presiza introdús dansa ba ofertóriu. Razaun tanba "Santa Missa mak renovasaun ita-nia Na'i ninia Sakrifisiu Úniku no Eternu (kf. CIC 1362-1372; 1411).

### b. Orasaun eukarístika

Orasaun eukarística (orasaun 'acção de graças' no konsagrashaun nian) nia parte sira mak hanesan tuirmai ne'e:

- 'Acção de graças' – amululik hodi povu santu nia naran glorifica no fó grasa ba Maromak, esprime liuliu iha 'Prefácio', ba obra salvasaun, tuir mós festividade.
- Aklamasaun – ho knananuk Sanctus, hahí Maromak hamutuk ho anju sira hotu.
- 'Epiclese' – Igreja implora liuhusi invokasaun espesiál sira Espíritu Santu nia kbiit atu konsagra don sira no óstia bele sai salvasaun ba ema sira ne'ebé simu nia iha komuñaun.
- Narrasaun instituisaun no konsagrashaun – liuhusi Kristu nia liafuan no jestu sira, realiza sakrifisiu ne'ebé Nia harii iha Han-Kalan Ikus, hodi oferese ninia Isin no Raan haksumik iha paun no tua.
- 'Anamnese' - Igreja halo memória Kristu nian, liuliu ninia paixaun, resurreisaun no

axensaun.

- Oblasaun – Igreja ne'ebé halibur daudaun, oferese ba Na'i, iha Espíritu Santo, óstia imakulada.
- Interseasaun sira – esprime komuñaun ho Igreja tomak, ida lalehan no rai nian, katak oblausaun ne'e hasa'e ba ninia membru sira hotu, moris no mate sira, ne'ebé simu bolun atu partisipa iha redensaun no salvasaun mai husi Kristu nia Isin no Raan.
- 'Doxologia final' – esprime glorifikasiasaun ba Maromak, ne'ebé amlulik de'it mak harohan, no asembleia konfirma ho 'amen' solene.

### Observasaun ruma:

- Orasaun Eukarística tenke tuir fórmula ne'ebé iha ona (iha 'Missal Romano'); amlulik sira labele aumenta ka hamenus (kf. RS 51).
- "Enkuantu Amlulik celebrante proklama Orasaun Eukarística, labele realiza orasaun seluk eh knananuk sira no órgaun no instrumentu muzikál sira seluk sei nonook, menus povu nia aklamasaun sira, nu'udar ritu aprobadu" (RS 52).
- Aklamasaun SANTU tenke ho música solene (hananu anju sira-nian) no labele estilu dansa fali;labele troka liafuan sira.
- Silu paun la halo durante konsagrashaun (RS 55).
- Jestu liman ne'ebé amlulik sira halo iha 'epiclése' mak liman doko tun, bainhira konsagrashaun liman nia jestu hatudu ba paun no tua.
- Doxologia: amlulik de'it mak haklaken. Sei sai solene liu se nia hananu no povu mós hatán 'Amen' hodi hananu mós.
- Diákonu labele proklama "Mistériu fiar nian".
- Ema isin-di'ak ne'ebé la hakneak ba Santíssimu Sakramentu, la hakneak iha momentu 'epiclése', nia falta edukasaun.

### c. Ritu komuñaun nian

Finalidade ritu komuñaun nian mak prepara sarani sira atu simu Na'i nia Isin no Raan nu'udar ai-han espirituál.

- **Ami Aman** – Amlulik fó konvite, no hotuhotu harohan ho amlulik, husu ai-han loroloron nian, katak ai-han eukarístiku. Molok remata, amlulik harohan mesak 'embolismo', ne'ebé povu hatán ho 'doxologia'.
- **Ritu dame nian** – Orasaun ne'ebé amlulik mesak harohan hodi Kreda nia naran husu dame no unidade ba nia no ba família umana

tomak. Kona-ba sinál dame nian, Konferénsia episkopál mak deside, tuir costume rai nian. Maibé sei fó de'it dame ba maluk ne'ebé besik. Iha momentu ne'e la hananu knananuk dame nian, tanba momentu ne'e labele kleur. Amlulik bele fó dame ba akólitu sira, maibé labele husik presbitériu.

- **Silu paun** – Amlulik silu paun eukarístiku no diákonu bele tulun no tau parte ida iha kálix, atu signifika unidade Na'i nia Isin no Raan. Frasaun paun nian hakarak dehan katak maski sarani sira barak, sai Isin ida de'it Kristu. Enkuantu amululik silu paun, schola eh kantór hananu eh harohan ho lian maka'as Maromak nia Bibi-Oan.

- **Komuñaun** – Amlulik prepara an ho orasaun iha silénsiu, sarani sira mós halo hanesan. Hafoin amlulik hatudu paun eukarístiku iha patena leten eh iha kálix nia leten no konvida sira ba Kristu nia meza. Enkuantu amlulik komunga, hahú hananu knananuk komuñaun nian. Ritu Komuñaun nian taka ho orasaun depoizde komuñaun hodi husu rezultadu di'ak husi misteriu sira ne'ebé foin selebra.

### Kestaun práтика ruma

- Jestu loke liman durante orasaun dominikál ‘Ami Aman’, amlulik de'it mak halo.

- Orasaun Ami Aman ita reza ho ‘ezaltasaun’, se hananu, tenke tuir lolos liafuan sira Kristu dehan.

- Observasaun ida tan: iha Missa de'it mak ita la dehan ‘amen’ iha finál Ami Aman, tanba sei iha kontinuidade ho “embolismo”.

- Antes komuñaun fó admonisaun, atu ema ne'ebé hakbesik Komuñaun sira hatene se sira soi eh lae, exemplu ema ne'ebé seidauk sarani eh halo Primeira Komuñaun mós.

- Simu komuñaun iha ibun eh iha liman, Konferénsia episkopál mak sei deside. Razaun simu komuñaun iha liman tanba ijiene. “Maibé, iha kuidadu espesiál atu ida-ne'ebé komunga konsome kedes óstia iha ministru nia oin, atu la iha ema ida desloka ho espésie eukarística sira iha nia liman laran. Se eziste perigu profanasaun nian, la fahe Komuñaun ba sarani sira iha liman laran” (RS, 92).

- Observasaun ida ba koru atu komunga kedes, labele fó importánsua liu ba kanta duké simu Komuñaun.

- “La permite ba ema ne'ebé komunga habokon rasik óstia iha kálix, nune'e mós simu

óstia bokon iha liman. Kona-ba óstia ne'ebé tenke habokon, nia tenke husi matéria válida no konsagra ona, hodi esklui ho modu absoluto paun la konsagra eh matéria seluk” (RS, 104).

- “La fó lisensa atu sarani sira foti rasik, menus liután atu pasa ba malu husi liman ba liman óstia konsagrada nune'e mós kálix sagradu. Aleinde ne'e, tenke halakon abuzu atu kabén-Na'in sira, iha Missa kazamentu nian, administra ba malu sagrada Komuñaun” (RS 94).

- Atu simu Komuñaun tenke partisipa Missa completa, basá liturjia liafuan (meza liafuan nian) nian mak prepara ba Eukaristia (meza eukarística). Mai tarde la'ós tanba hakarak rasik, bele ba simu Komuñaun.

- Hotu tiha Komuñaun mak momentu “agradesmentu nian” ne'ebé halo ho forma silénsiu nian eh ho hananu apropiadu ida.

- Atu evita perigu óstia monu, tenke mantein bandeja ba Komuñaun sarani sira-nian (kf. RS, 93). Se óstia eh partíkula ruma monu, sei foti ho reverénsia; no se monu iha foer, lori ba fatin apropiadu eh sumidoiro. Se Na'i nia Raan fakar, sei hamoos fatin iha-ne'ebé monu bá ho bee no fakar bee ne'e iha sumidoiro ne'ebé iha sakristia. (Kf. IGMR 280, 334).

- Atensaun atu la halo orasaun depoizde Komuñaun se Komuñaun sarani sira-nian seidauk remata.

### 4. RITU KONKLUZAUN NIAN

Saudasaun ikus, haruka ita bá hala'o misaun. Inklui iha-ne'e komunikasaun badak, se presiza; amlulik nia saudasaun no bensan; despedida ba povu husi diákonu eh amlulik ho liafuan “Ite Missa est”; re'i altár, no hakruuk ho respeitu kle'an ba altár husi amlulik, diákonu no ministru sira seluk ninia parte.

#### Observasaun:

Hananu ikus iha Missa la halo parte ritu. Partisipante ida-idak sai ho silénsiu husi Igreja. Tuir Bispu Basílio do Nascimento nia esklaresimentu, tanba iha Timor, Missa remata, se la hananu sai fali hanesan ‘feira’, di'ak liu ita hananu knananuk ikus nian.

(JG)\*\*\*\*\*

# Tatoli - Lidun moris konsagrada

# ITA-NIA ESPERIÉNSIA MORIS NIAN



# IHA FIDELIDADE BA KARIZMA HANOIN HIKAS EKONOMIA

«Iha fidelidade ba karizma hanoin hikas “Institutos de Vida Consagrada e as Sociedades de Vida Apostólica” nia ekonomia»: ne’e mak tema Simpóziu Internasionál Daruak kona-ba ekonomia halo iha Roma husi 25-27 Novembru 2016 iha “Pontificia Università Antonianum”. Amu-Papa Francisco mós hato’o ninia liafuan sira ba ekónoma no ekónoma jerál 1.000 ne’ebé partisipa iha enkontru ne’e.

Maun no biin-alin doben sira,

Ha’u agradese ba imi-nia disponibilidade hodi hasoru malu atu reflete no reza kona-ba temática ida vitál liu ba vida konsagrada, hanesan jestau finanseira imi-nia obra sira-nian. Ha’u agradese ‘Congregação para os Institutos de Vida Consagrada e as Sociedades de Vida Apostólica’ ba preparasaun simpóziu daruak ne’e nian; no hodi dirije ba imi, ha’u husik atu liafuan sira ne’ebé kompoin título imi-nia enkontru nian: karizma, fidelidade, hanoin hikas fali ekonomia.

## Karizma

Iha Igreja, karizma sira la reprezenta buat ruma estátku no ríjido, la’ós «pesa sira muzeu nian». Iha kontráriu, sira mak mota bee moris nian (kf. Jo 7, 37-39) ne’ebé suli iha rai istória nian atu rega no halo fini Di’ak nian natubu. Iha momentu ruma, ho envolvementu saudade estéril, it abele iha tentasaun atu halo «arkeolojia karizmática». Keta akontese atu ita monu ba tentasaun ida-ne’e! Karizma mak nafatin realidade moris nian ida no ezatamente tanba razau ida-ne’e mak nia simu bolun atu fó fuan, hanesan hatudu mai ita iha ai-kanoik kona-ba osan-mean ne’ebé liurai entrega ba nia atan sira (kf. Lc 19, 11-26), atu dezenvolve nia iha fidelidade kriativa, hanesan Igreja la para atu fó hanoin mai ita (kf. João Paulo II, Exor-



tação Apostólica pós-sinodal Vita consecrata, 37).

Tuir nia natureza, vida konsagrada mak sinál no profesia Maromak nia reinu nian. Tanba ne’e, labele falta karakterística rua ne’e iha ninia forma sira hotu, sarak ita konsagrada sira nafatin vijilante no atentu atu fihir

orizonte sira ita-nia moris nian no momentu atuál. Atitude ida-ne’e halo atu karizma sira, ne’ebé Na’i oferece ba ninia Igreja liuhusi ita-nia fundadór no fundadora sira, mantein votál no bele korresponde ba situasaun konkreta fatin no tempu sira iha-ne’ebé ita simu bolun atu kompartilla no fó sasinfafurak ‘sequela Christi’ nian.

Ko’alia kona-ba karizma signifika ko’alia kona-ba don, gratuitidade no grasa; katak book an iha área ida ho signifikadu ne’ebé hetan roman husi nia abut ‘charis’. Ha’u hatene katak ba ema barak ne’ebé servisu iha kampu ekonomia nian liafuan sira-ne’e parase irrelevante, no tenke lori ba esfera partikulár no religiozoa. Maski nune’e, inkluzive ekonomista sira, hatene ona katak sosiedade lahó ‘charis’ labele funsiona di’ak no sei hotu remata atu dezumaniza nia an rasik. Ekonomia no ninia jestau nunka neutrál iha étika no iha antropolojia. Se la buka harrii relasaun justisa no solidariedade nian, sei hamosu situasaun ezklazaun no até rejeisaun nian.

Nu’udar konsagradu/a sira, ita simu bolun atu sai profesia hahú husi ita-nia moris

ne'ebé hetan kbiit husi 'charis', husi lójika don no gratuidade nian; ita simu bolun atu kria fraternidade, komuñaun no solidariedade ba ema sira ne'ebé kiak liu no iha nesessidade. Hanesan Papa Bento XVI fó hanoin, se ita hakarak tebes duni sai umanu, ita tenke «fó espasu ba prinsípiu gratuidade nian nu'udar espresaun fraternidade nian» (Carta Encíclica Caritas in veritate, 34).

Maski nune'e, lójika evanjélica don nian ezije atu iha mós atitude interiór abertura nian ba realidade no rona Maromak ne'ebé ko'alia mai ita. Ita tenke husu se ita prontu atu «hafoer liman sira», hodi serbisu iha istória ohin nian; se ita-nia matan sira hatene fihir sinál sira Maromak nia reinu nian iha rungranga sira moris nian, loos duni kompleksa no kontratstante, maibé Maromak hakarak fó bensan no salva; se ita sai tebes duni maluk la'os dalan nian ba mane no feto sira itania tempu nian, liuliu sira hotu ne'ebé latan kanek iha ita-nia lurón sira, tanba ho sira ita partilla espetativa sira, ta'uk sira, esperansa sira no mós buat ne'ebé ita simu, no pretense ba ema hotu; se ita la husik lójika diabólica lukru nian domina ita (diabu dalabarak tama liuhusi karteira eh kartaun kréditu nian); no se ita defende an husi buat ne'ebé ita la comprende hodi evita, eh selae hela iha situasaun nia laran hodi Na'i nia promesa nia kbiit, ho ninia matan laran-di'ak nian ho ninia knotak mizerikórdia nian, hodi sai samaritanu di'ak ba ema kiak no eskluidu sira.

Lee interrogasaun sira atu fó resposta ida ba sira, rona tanis atu konsola, rekoñese injustisa atu kompartilla mós ita-nia ekonomia, dixerne insecuransa atu oferece dame, enfrenta ta'uk sira atu fó hakmatek: ne'e mak aspetu oioin husi vida konsagrada nia rikusoin. Hodi aseita katak ita la iha resposta hotu no, dalaruma, ita tenke hela iha silénsiu, karik mós insertu, maibé nunka lakon esperansa.

## Fidelidade

Sai fiél signifika husi ita-nia an saida mak ohin, iha situasaun ida-ne'e, Na'i husu ita atu sai no atu halo. Sai fiél kompromete ita iha

esforsu badinas dixernimentu nian nune'e obra sira, koerente ho karizma sira, kontinua sai instrumentu efikás atu nune'e Maromak nia ternura to'o ba ema barak.

Obra sira, ne'ebé kongresu ida-ne'e haree, la konstitui de'it meiu ida atu asegura Instituto nia sustentabilidade, maibé pretense ba karizma nia fekundidate. Ida-ne'e ezije atu ita husu ba an rasik se ita-nia obra sira manifesta eh lae karizma ne'ebé ita profesa, se korresponde eh la ba misaun ne'ebé Igreja konfia mai ita. Kritériu prinsipál avaliasaun ba obra sira la'ós ninia rentabilidade (fó lukru), maibé se korresponde ba karizma no ba misaun ne'ebé Instituto simu bolun atu kumpri.

Sai fiél ba karizma dala barak husu jestu korajen: la'ós faan buat hotu la'ós mós aliena obra sira hotu, maibé halo dixernimentu sériu, hodi fihir metin Kristu, tilun sira atentu ba ninia Liafuan no kiak sira nia lian. Ho modu ne'e, ita-nia obra sira bele, tempu hanesan, fó fuan ba Instituto nia, hodi manifesta Maromak nia predilesaun ba kiak sira.

## Hanoin hikas fali ekonomia

Buat ne'e hotu komporta hanoin hikas fali ekonomia, liuhusi leitura atenta ba Maromak nia Liafuan no istória. Rona Maromak nia lian-halerik no kiak sira nia hakilar, kiak baibain nian no kiak foun sira; comprende saida mak Na'i husu ohin no, depoizde comprende, atua ho konfiansa ne'ebé barani iha Aman nia Providénsia (kf. Mt 6, 19 ss.), ne'ebé ita-nia fundadór no fundadora sira iha. Iha kazu ruma, dixernimentu bele sujere atu mantein obra ida ne'ebé prodús lalakon [perda] – hodi fó atensaun boot atu lalakon ne'e la mai husi inkapasidade no inkompténsia – maibé fó hikas dignidade ba ema sira vítima descarte nian, fraku sira no fraxil sira: sira-ne'ebé atu moris, sira ne'ebé kiak liu, katuas-ferik moras sira, maklorik sira defisiénsia grave nian. Loos duni katak eziste problema mai husi idade avansada husi konsagradu/a barak no kompleksidade jestaun nian ba obra ruma, maibé disponibilidade ba Maromak lori ita atu hetan solusaun

sira.

Karik dixerimentu sujere atu hanoin hikas obra ida, ne'ebé sai boot no kompleksa de-mais, se nune'e ita bele hetan forma sira kolaborasaun nian ho Institutu seluk eh até nakfilak obra hodi nune'e bele kontinua, maski tuir modalidade seluk, nu'udar obra Igreja nian. Tanba ne'e mak importante mós komunikasaun no kolaborasaun iha ámbitu sira Institutu sira-nian, ho Institutu sira seluk no ho Igreja lokál. Iha kontestu Institutu sira-nian, labele hanoin provínsia oioin iha maneira autor-referensiál, hanesan fali ida-idak moris ba nia an rasik, governu jerál bele ignora pekuiliaridade oioin.

Lójika individualizmu bele halo nakukun ita-nia komunidade sira. Tensaun entre realidade lokál no jerál,

ne'ebé eziste iha planu inkulturasau karizma nian, eziste mós iha nível ekonómia, maibé labele hakfodak; tenke moris ida-ne'e no enfrenta.

Nesesáriu halo buras komuñaun entre institutu oioin; no mós koñese didi'ak instrumentu lejislativu sira, jurídiku sira no finanseiru sira ne'ebé ohin permiti kria rede ida, hetan resposta foun sira, tau hamutuk forsa sira, institutu sira ninia profisionalizmu no kapasidade sira, ba servisu Reinu no umanidade nian. Importante liu mós atu halo diálogu ho Igreja lokál atu nune'e, bainhira bele, soin ekleziástiku sira permanese nu'udar soin Igreja nian.

Hanoin hikas ekonomia hakarak espresa dixerimentu ne'ebé, iha kontestu ne'e, haree ba diresaun, finaidade sira, signifikadu no implikasaun sosiál no ekleziál sira husi hilin finanseira ne'ebé Institutu bida konsagrada sira halo. Dixerimentu ida ne'ebé hahú husi avaliaisaun ba possibilidade ekonómica sira mai husi rekursu finanseiru no pesoál sira; ne'ebé fiar iha kontribuisaun husi espesialista ba utilizasaun instrumentu sira ne'ebé la improviza ne'ebé permiti jestau prudente no controle ba administrasaun; no atua iha respeitu ba lei sira, hodi serví ekolojia ida

ne'ebé integrál. Dixernimentu ida ne'ebé, liiliu sai kontra korrente tanba 'uza osan' no 'la'ós serví osan' ba motivu naran de'it, maski justu no santu. Iha kazu ne'e, nia sai diabu nia teen, hanesan Padre santu sira uluk hateten tiha ona.

Hanoin hikas ekonomia ezije kompeténsia no kapasidade espesífika sira, maibé ida-ne'e dinámika ida ne'ebé kona ema hotu no ema ida-idak nia moris. Ne'e knaar ida ne'ebé labele delega ba ema ida, maibé ezije ema ida-idak nia responsabilidade tomak. Iha-ne'e mós ita horik iha dezafiu edukasionál ida nia oin, ne'ebé labele esklui konsagrada/a sira. La duvida, dezafiu ida ne'ebé uluknai kona ba tezoureiru sira no sira ne'ebé envolve an iha fatin dahuluk ba Institutu nia

hilin sira. Ezije ba sira atu sai prudente hanesan samea no simples hanesan manu-falur (kf. Mt 10, 16). Ne'e mak matenek sariani ne'ebé permiti

atu distinge entre asu-fuik no bibi-malae, basá eziste asu-fuik barak mak disfarsa an nu'udar bibi-malae, prinsipalmente bainhira osan tama iha klaran!

Aleinde ne'e, ita labele haluha katak ita-nia Institutu vida konsagrada rasik la livre husi risku ruma, hatudu iha ensíklika Laudato si': «Prinsípiu masksimizaun lukru nian, ne'ebé buka izola an husi konsiderasaun hotu, mak distorsaun [konseituál] ida ekonomia nian» (n. 195). Ohin loron mós, konsagrada hira mak kontinua hanoin katak lei sira ekonomia nian independente husi konsiderasaun étika hotu? Dala hira mak avaliaisaun kona-ba obra ida nia transformasaun, eh faan imovel ida haree bazeia de'it iha análise kustu-benefisiu no iha valór merkадu nian? Maromak hasai ita husi espíritu funsionalizmu nian no halo ita la monu iha hani kaan nian! Aleinde ne'e, ita tenke eduka an ba austeridade responsável ida. La suficiente halo profisaun religioza atu sai kiak. La suficiente defende an ho afirmasaun katak ha'u la soi buat ida tanba ha'u religiozu, reli-

jioza, se ha'u-nia institutu permiti ha'u jere eh goza soin hotu ne'ebé ha'u hakarak, no kontrola fundasaun sivil sira ne'ebé nia harri atu mantein obra rasik sira, hodi nune'e evita kontrole sira husi Igreja nia parte. Konsagradu/a sira ne'ebé moris hanesan ema riku nia ipokrizia, hakanek sarani sira nia konxiénsia, hodi prejudika Igreja.

Presiza hahú husi hilin ki'ik sira loroloron nian. Ema ida-idak simu bolun atu hala'o ninia parte, atu utiliza soin sira atu halo opsaun solidária sira, atu tau matan ba kriasau, atu sukat nia an ho família sira ne'ebé moris iha nia sorin ninia pobreza. Ne'e katak manán 'habitus' ida, estilu ida, iha sinál justisa no partilla nian, hodi haka'as an iha esforsu — basá dala barak kómodu liu nia kontráiu — atu halo hilin sira onestidade nian, konxiente katak ne'e mak simplesmente buat ne'ebé ita tenke halo (kf. Lc 17, 10).

Maun no biin-alin sira, ha'u hanoin fali testu bíbliku rua ne'ebé ha'u hakarak husik ba imi-nia reflesaun. Iha ninia Surat dahuluk, João hakerek: «Ema ne'ebé soi soin sira mundu ne'e nian no haree ninia maluk sofre nesesidade, maibé taka nia fuan, oinsá mak Maromak nia domin bele horik iha nia? Ha'u-nia oan doben sira, ita keta hadomi ho liafuan sira nune'e mós ho nanál, maibé ho hahalok no lia-loos» (3, 17-18). Testu da-ruak mak koñesidu liu. Ha'u refere ba Mateus 25, 31-46: «Bainhira imi halo ida-ne'e ba ha'u-nia alin ida ki'ik liu, imi halo mai ha'u rasik. [...] Bainhira imi la halo ida-ne'e ba sira ki'ik ne'e ida, imi la halo mai ha'u». Imi konsidera filfali imi-nia ekonomia, iha fidelidade ba karizma.

Obrigadu! Keta haluha harohan mai ha'u. Na'i haraik bensan ba imi no Virjen Santa proteje imi!

Vaticano, 25 Novembru 2016

(Tradusaun JG nian)

\*\*\*\*\*

## INTEGRASAUN RELIJOZA PERSONALIDADE NIAN

*Iha relasaun metin entre natureza no grasa, entre nível psicolójiku no espirituál. Ekilíbriu iha nível umanu bele simplifica vida espirituál tanba bainhira iha vizaun realista kona-ba an rasik bele mós iha abertura boot liután ba Espíritu.*

Ema forma husi estrutura pesoál unitária: unidade psiko-física espirituál (elementu biolójiku, psicolójiku, rasionál-espirituál. (Joseph Nuttim), no sai tasak bainhira nível tolu ne'e integra malu. No atu sai tasak ita liu husi krize sira. Krize signifika momentu ida iha-ne'ebé iha turbamentu iha ekilíbriu anteriór (emotivu no kognitivu), bainhira organizaun presedente la funsiona mosu instabilidade iha ema, presiza kria fali síntese foun, modu foun atu hetan ekilíbriu. Krize halo parte realizmu umanu no tulun atu halo sai ativu ita-nia rekursu sira.

### *Interdependénsia entre maturasaun psicolójika no maturasaun espirituál*

Iha relasaun metin entre natureza no grasa. Grasa supoiun natureza, grasa la harahun natureza humana, grasa bazeia ba natureza, la haketak an husi meiu naturál sira. Ita labele husik buat hotu ba grasa, maibé tenke uza meiu naturál sira. Ba maturasaun espirituál preszia indívíduu nia kooperasaun, la'ós hakaran de'it, maibé kapasidade operativa. Maromak hakarak atu ita haka'as an, katak ha'u halo buat hotu ha'u tenke halo, kolabora ho asaun grasa nian. Iha nível umanu, atu bele kolabora ho ema seluk uluknanai tenke hadook an/ihā distásia husi an rasik. Ema tenke hatene rona, husik ninia hanoin rasik, projetu rasik atu loke an ba perspetiva diferente.

Ekilíbriu iha nível umanu bele simplifica vida espirituál tanba bainhira iha vizaun realista kona-ba an rasik bele mós iha abertura boot liután ba Espíritu.

Kreximentu espirituál implika:

- kapasidade humana hadomi nian (abertura no disponibilidade, desentramento, atensaun, interesse ba ema seluk, maibé la'ós atu possui nia eh kontrola nia). Ne'e mak baze ba karidade.
- Esforsu kolaborasaun nian ho ema seluk.
- Hatene rona, hodi la impoin pontude-vista rasik, dsitinge pontudevista rasik husi ema seluk nian, hakribi ha'u nia pontudevista rasik.

Nune'e mak importante maturasaun nível psikolójiku no espirituál la'o hamutuk.

### **Prosesu integrasaun religioza personalidade nian**

Ema religioza sai ema integrada se nia iha konsisténsia eh estabilidade interna katak iha an rasik. Bainhira ema konsege iha ekilíbriu ho



facilidade, ida-ne'e tanba ema ne'e hatene no hanoin nafatin buat ne'ebé esensiál no buat ne'ebé perifériku. Ema ida-ne'e iha ninia laran, iha nina estrutura laran soi jerarkia valór nian, no iha momentu difikuldade nian, nia hatene ba fali realidade esensiál sira.

Integrasaun psíkika mak prosesu kontínuu iha moris tomak, basá ita-nia personalidade mak buat rumा dinámika, la'ós estática eh parada. Presiza halo hilin signifikativu iha situasaun sira. Bainhira ita halo hilin signifikativu, ho tempu ne'ebé liu, ita hatene tau iha fatin daruak aspetu sira ne'ebé la esensiál; nesesidade no hakaran balun neineik-neineik ita tau ba sorin, bainhira la tama iha jerarkia valór nian. Ho tempu ne'ebé liu, realidade periférica balun sai ladún forte no ema sai hakmatek. Tanba ne'e, presiza to'o ba autonomia, maibé ida-ne'e dalan ida loron ba loron nian: dalan integrasaun nian.

Aspetu rumा ne'ebé husu haka'as an liután atu integra:

- integra dinámika afetiva sira (ta'uk dinámika sira afetividade nian);
- integra motivu rasik sira
- halo tasak sentidu realizmu nian iha vida komunitária.

Konsege halo pasajen sira ne'e signifika katak ita hatene enfrenta momentu kritiku sira, momentu difikuldade nian, nu'udar momento oportunidade nian.

**Realizmu** signifika adere ba realidade interna rasik, ba moris internu rasik, korajen atu rekoñese buat ne'ebé ita la gosta iha an rasik. Halo nune'e ita mós sei sai realista ho ema seluk.

**Maturidade**, la'ós buat rumा estátiku maibé d i n á m i k u . La'ós buat rumा ita hetan dala ida de'it maibé prosesu kontínuu kreximentu nian, ne'ebé lori ema atu sai neon-na'in hodi dehan katak sei presiza koñese barak liután no aprende husi mundu no husi an rasik. Prosesu kontínuu ne'e, iha nia momentu aas nian no momentu hakdasak nian, iha momentu regresau no inserteza nian; iha kuadru ne'e ita bele hatama ita-nia defeitu sira, ita-nia toman aat sira, ita-nia salan konxiente sira!

Ita distinge maturidade objetiva ho maturidade subjetiva:

- *Maturidade objetiva* mak meta ida atu to'o, maibé ita labele konsege totalmente, ho modu perfeitu.
- *Maturidade subjetiva*, indika situasaun ema ida-nian, konxiente kona-ba ninia limitasaun rasik, konxiente kona-ba ninia possibilidade sira no haka'as an iha ninia dalan.

(JG)

Tatoli - TAMA KLE'A N BÁ

# the **NET**



# FIAR NU'UDAR REKURSU BA UMANIZASAUN RELASAUN DIJITÁL

*La ós rede (dook no labele kontrola) ne'ebé esprime ódiu ba ema seluk, maibé ema lubuk ida (ho isin no ruin) ne'ebé hili ho liberdade eh lae (karik menus libre) atu halo interasaun ho modalidade agresiva... La eziste "web people" (povu web nian) ne'ebé dook no misteriozu, eziste mak ita ne'ebé halo hahalok online dignu eh la dignu.*

Iha Dezembru 2006 revista Time, atu celebra internet, hili nu'udar «person of the year “You” (Ó)» no tau iha kappa komputadór pesoál ida ho screen ne'ebé reflete, hodi akompaña ho título “Ó kontrola tempu informasaun nian, benvindu iha ó-nia mundu”. Liutiha tinan sanulu, iha Agostu 2016, semanál hanesan dedika filafai kapa ba internet, no oras ne'e ho figura monstru ida nian – ne'ebé reprezenta ida-ne'ebé hamosu polémika diskusaun inutil – ho título: “Tanba sá ita lakon internet ho kultura ódiu nian”.

Saida mak akontese? Natón de'it tinan sanulu atu entuziazmu ba possibilidade informasaun personalizada remata? Defaktu ita bele haree buat oio-in mosu iha web ne'ebé halo ita la kontente. Parese katak Facebook, Twitter, espasu sira comentáriu nian ba notísia sira media nian sai nafatin terrenu atu nafatin ha-funu malu. Ita haree oinsá ema publika insultu sira; ema balun habelar video kona-ba ema seluk, halo ‘edit’ no troka liafuan sira atu difama ema seluk, nst.

Iha buat sira-ne'e nia oin saida mak ita halo?

Tentasaun ida mak hamate tiha media atu defende an husi komunikasaun ladi'ak, brútál sira, hanesan fali teknolojia mak problema. Tentasaun seluk mak hadook an husi problema. “Povu web nian”, “troll”, “hater”, “Rede violenta”: ne'e mak espresaun sira atu deskreve fenómenu online sira, hanesan fali buat sira ne'e independente no la liga ho ema nia liberdade. Halo nune'e, katak kon-

sentra iha estratéjia preventiva sira (“hamate tiha tanba halo aat ba ó”) no hadook an (rede promove ódiu”), ita la tama iha sentru problema nian iha-ne'ebé mundu dijital husu ho forsa: ema sira no sira nia grau liberdade nian atu jere relasaun online.

## Umaniza web



Buat ne'ebé di'ak mak halo esforsu tuir ita bele ho asaun konkreta (la ós proteje an) no aprosimasaun (la ós rede maibé ema sira ne'ebé halo hilin online) ita bele hahú asaun edukativa no kulturál efikás ba umanizaun web. Ho modu partikulár, fiar – nu'udar dimensaun espirituál kle'an fiar nian – la ós osbtáku ida maibé rekursu folin liu ba aprosimasaun umanizadora ne'e lahó prekonseitu defensiva.

Uluknanai presiza hasai husi kampu interpretasaun oin rua-rua kona-ba mundu dijital, ne'ebé la permite atu haree ninia realidade lolos. Ideia dahuluk – ne'ebé mai husi es-kema interpretasaun liga ho komunikasaun massa nian – mak kompara internet ho medium ida hanesan tuir komprensaun tempu uluk nian. Metáfora web nian nu'udar medium/meiu la iha kbiit atu kapta buat foun ne'ebé lolos ita oras ne'e hasoru hela: ida online mak dimensaun ida ne'ebé ita tama iha laran tanba instrumentu ida (ita-nia smartphone eh ita-nia computer), maibé instrumentu ne'e la hakohak ninia karakterística tomak.


Defaktu buat ne'ebé akontese online mak lala'ok relasaun nian entre ema sira. Fó atensaun de'it ba medium/meiu, hanesan jornál ida eh kanál televizivu, dudu ita atu hanoin kona-ba separasaun offline / online ne'ebé iha moris loroloron nian aprezenta mai ita. Iha tempu ida, lee jornál ida eh haree TV ema halo iha momentu presizu ida loron nian ne'ebé husu atu uza meiu espesífiku ida (tan ne'e mak termu/liafuan "halakan" eh "hamate" mak própriu TV nian).

Ohin loron fali ema moris nafatin online no offline lahó solusaun ida kontinuidade nian, basá ema halo interasaun ho ema seluk ho modalidade oioin, liuhusi prezensa (enkontru ida) eh liuhusi mediasaun dijítal ida (n.e. mensajen WhatsApp), hodi la distinge realmente momentu sira-ne'e. Ne'e mak modu diversu de'it atu halo buat hanesan: tama iha relasaun.

Metáfora seluk social nian ne'ebé la deskreve rikusoin hotu mak ida "virtual square" (prasa virtual) iha-ne'ebé ema hasoru malu no diskute. Tau énfaze ba karakterística ambientál no espasiál – haree web nu'udar fatin – la'ós apropiadu atu deskreve internet ninia realidade lolos: konjuntu ida relasaun nian entre ema sira.

Relasaun sira ne'ebé la kesi an ba limite espasu naran de'it no defaktu, la'ós virtuál: ofende online katak ofende tebes duni, la'ós halo-finji. Defaktu, web nu'udar web la eziste: web mak ita sira iha koneksaun. Se ita konsentra an de'it iha 'device' sira, antena sira ne'ebé liga malu, keyboard sira no touch screen sira, eh se ita avalia 'platform' nu'udar platform – hanesan Facebook no Twitter – ita la hetan iha sira buat ne'ebé karakteriza lolos natureza internet nian, ne'ebé halo husi ema sira no sira-nia modu atu halo interasaun.

Husi perspetiva ida-ne'e bele korrije – eh di'ak liután observa ho modu eficiente – fenómenu sira ne'ebé ita mensiona iha leten. La'ós rede (dook no labele kontrola) ne'ebé esprime ódiu ba ema se-



luk, maibé ema lubuk ida (ho isin no ruin) ne'ebé hili ho liberdade eh lae (karik menus libre) atu halo interasaun ho modalidade agresiva. La'ós rede mak lori ema ida atu oho-an tanba ema tau ninia video difama-saun nian iha web, maibé, ema ninja 'like' sira, partilla sira, komentáriuaat no lia-tolok sira no lahó respeitu ba ema, tau ho modu maizumenus ho intensaun ba video ne'ebé sirkula online. La eziste "web people" (povu web nian) ne'ebé dook no misteriozu, eziste mak ita ne'ebé halo hahalok online dignu eh la dignu.

### Teknoloja abilita ita ba relasaun ne'ebé ita ladauk haree molok ne'e

Iha momentu ne'ebé ita assume pontude-vista ida-ne'e, ita tau hikas orden ne'ebé permite ita atu projeta asaun sira ne'ebé posivel halo, Presiza serbisu iha umanu no iha umanidade, konxiente katak teknolojia kualifikasi ita ba possibilidade relasaun nian ne'ebé uluk nunka haree (ema ida nunka bele iha kontaktu diretu ho presidente Parlamentu) ne'ebé husu konxiénsia no kompeténsia boot liután. La'ós kualifikasaun ba kualifikasaun de'it (instrumentu teknolójiku) ne'ebé provoka komportamentu negativu, maibé falta kona-ba instrumentu edukativu no kulturál sira atu moris iha umanidade na-konu kualifikasaun ida-ne'e.

Husi sorin seluk, hakarak ka lakohi ita labele ignora no la tenke tau sees nia, maibé sim-plesmente konsidera ninia kbiit atu potensia kapasidade umana sira, ida di'ak liu eh ida halo atat liu.

Husi pontudevista ida-ne'e, ita bele tan-san pozisaun estrema rua: sira ne'ebé haree téknika matan la moos – katak sira

ne'ebé husu atu off no limita teknolojia – no sira ne'ebé entuziazmu boot ba teknolojia – ne'ebé haree eskluzivamente nu'udar progresu no oportunidade – halo erru avaliasaun nian ne'ebé hanesan: sira sakri-fika sentralidade ema nian

ba aspetu tékniku-instrumentál.

Tau ema iha smartphone nia oin no iha relasaun ho ema seluk iha social network nia laran, mak ita bele konsidera situasaun iha ninia kompleksu. Se ita hahú husi revista Time nia kapa, ita bele hetan ótika foun atu observa fenómenu ódiu nian, dezinformasaun nian no konfrontu sira iha web ne'ebé parese labele evita: la'ós buat foun ida, maibé ne'e mak manifestasaun ida husi ema ninia defeitu no limite sira ne'ebé nia sempre iha. Buat ne'ebé uluk haksumik no limita de'it ba grupu sosiál besik nian (ita hanoin ba ignoránsia no analfabetizmu) ohin haberlar, vizivel no sukat-belek, basá hotu-hotu, lahó selesaun ida, bele hakerek no publika online buat hotu ne'ebé liu husi sira-nia kutak, ho konsekuénsia tuirmai, efeitu negativu: ema ne'ebé partilla prekonseitu sira no krensa sira ne'ebé la iha fundamentu iha possibilidade atu hasoru malu online ho facilidade ida ne'ebé uluk laiha hasoru "mundu real", hodi haburas espíritu taka-an nian iha grupu sira ho opiniaun hanesan/omojé-neu ne'ebé konfrontu labele tama borus.

Hateke iha oin buat sira-ne'e hotu, bele haree no sukat, ida-ne'e vantajen ida. Resposta la'ós ida de'it, atu hamate tiha.

La'ós atu konsentra iha bainhira no tempu hira atu tau "off" – evita perigü sira mak pontu hahú de'it –, kampu loos ne'ebé husu resposta urgente mak saída mak akontese iha momentu tau "on" no tuirmai. Iha ne'ebá mak presiza dalan atu aprende atu kuda relasaun online kualidade nian.

### Fiar iha situasaun dijital

Iha perspetiva ida-ne'e fiar bele sai rekursu prometedór ida atu hatán ba dezafiu sira situasaun dijital nian, naran katak comprende nia iha ninia dimensaun loos.

Se komprende fiar iha ninia dimensaun esterior de'it no iha hola-parté de'it, eh nu'udar Sistema krensa irrationál, nia bele iha efeitu la di'ak. Nia prova mak krítika vi-

olenta kona-ba tema morál sira, nune'e mós kona-ba fenómenu ta'uk nian hasoru "diversu relijozu". Iha perspetiva ne'e mós mak teoria pseudo-scientífica sira (falsa) ne'ebé grupu balun uza atu adopta ninia prinsípiu sira atu defende no opoin vizaun alternativa sira seluk. Se fiar mak ida-ne'e, katak konviksaun ne'ebé la liga ho asaun, nia sai obstáculo de'it. Maibé se fiar sai atitude interior kona-ba konxiénisa destinu ida boot liu, babukak sentidu nian husi aparénsia sira; se fiar sai konfiansa iha lia-loos ne'ebé ema hotu rekoñese, nia bele sai estímulu forte ida ne'ebé merese konsiderasaun boot.

Fiar iha sentidu ne'e sai forsa ne'ebé hakbesik no habadak distânsia sira.

Problema ne'ebé ita deskreve kona-ba divizaun no konflitu sira mak, defaktu, uluknai problema ida distânsia nian. Konsid-

erasaun ida-idak kona-ba realidade "husi leten" – hanaran helicopter view –, maski parese modu di'ak liu atu haree, defaktu halakon husi realidade ninia karakterística

saliente sira: ema sira.

Ita hanoin ba mapa relijiaun sira-nian iha mundu: sira reprezenta sá loos, se la'ós divizaun oioin?

Ita hanoin ba kampu refugiadu sira nian haree husi leten: ida-ne'e saída loos, se la'ós konjuntu indefinidu ida barraka aat nian? Maibé vizaun sira ne'e deskreve realidade sira-ne'e eh falta ema sira-nia moris nu'udar protagonista sira iha mundu ida nune'e? Ne'e mak buat ruma akontese beibeik iha web: hun diskusaun nian mak instintu distansiametu nian ne'ebé la haree ema sira. Haree ema husi dook, husi diferença perspetiva nian, husi ninia ideia no super-estrutura sira. "Ema seluk dook" ne'e sai ba beibeik antagonista, inimigu, funu-balú, diversu ida ne'ebé ita tenke kuidadu no defende husi nia: ita "lakon" nia nu'udar ema.

Saida mak akontese se, iha kazu hotu ne'ebé ita temi ona, ema halo movimentu kontráriu? Se ita hakbesik, refugiadu sei hatudu nia an: ema ida – hanesan ha'u – iha

kondisaun nesesidade nian; ema relijaun seluk, aleinde ninia modu hatais, ko'alia, haree ba mundu, nia apresenta an nu'udar ida hanesan ha'u ne'ebé fiar iha sasán sira; adversáriu ideolójiku mós ha'u bele hateke ba nia nu'udar ninia an rasik: ema ida hanesan ha'u ne'ebé iha ideia diferente kona-ba mundu. Husi besik, maski mundu ho eskema la hanesan, ita rekoñese malu nu'udar ema.

No ita sei ladún ta'uk. Ne'e mak buat buat ne'ebé Papa Francisco konvida ita, fiar-na'in no lae, ho ninia komportamentu.

Amu-Papa moris modu hakbesik nian ba ema seluk nu'udar estílu moris nian. Ninia insisténsia ba sira ne'ebé ikus liu la'ós buat seluk se la'ós ida-ne'e: bele haree di'ak mundu la'ós husi distânsia vizaun aérea nian maibé husi kraik kontaktu nian ho ema ne'ebé iha pozisaun desvantagen nian. Papa Francisco nia fiar mak fiar ne'ebé hola isin: foti inspirasaun husi Maromak ida ne'ebé salva mundu la'ós husi leten, husi kondisaun divina nian, maibé hakbesik ema hodi sai ema iha ema sira nia leet, atu assume kondisaun humana.



ema seluk fiar no, maski laloos, ne'e mak nafatin buat ne'ebé nia investe ninia moris: mai husi dimensaun humana profunda liu. Karik ema sira ne'ebé ita hanaran "hater" husi dook, tanba ninia liatolok sira hasoru ema seluk iha web, se haree besik nia ema ida ne'ebé presiza tulun no komprensaun.

Ita la lakon web ida, ita-nia destinu mós la'ós kultura ódiu no informasaun laloos nian.

Online nune'e mós iha situasaun humana seluk, ema sira nu'udar ema livre bele nafatin halo diferença. Presiza de'it tau matan kona-ba ne'e. Presiza fiar filafali iha liberdade no possibilidade atu sai responsavelmente umanu maski ho smartphone iha liman iha koneksaun ho mundu. Fiar iha Maromak ne'ebé halo an ba ema ida-ne'e mak bele no tenke dudu ita ba movimentu aprosimasaun ida-ne'e.

Bruno Mastroianni  
(Jornalista no  
especialista iha relasaun ho media)

\*\*\*\*\*

### Fiar iha possibilidade atu sai ema responsavel

Iha sentidu ida-ne'e, fiar mak impulsu ida atu tau matan ba ema sira hahú husi sira-nia realidade rasik, maski sira-nia kondisaun ignorânsia no informasaun-laek nian eh modu violentu sira espresaun ódiu online. Se loos duni web hani ema sira iha dadulas opiniaun nian (konfuzau no lahó baze), solusaun mak la'ós bandu internet eh observa fenó-menu husi dook, atu prezerva an, maibé tama iha dadulas ne'e atu koko halakon nia ho pasiênsia, babesik, hodi buka halo apelu ba liberdade no ba kualidade humana sira ne'ebé di'ak liu. Hodi komprende diferença no diverjênsia sira – maski hetan manipulasaun, instintiva, la di'ak – ne'e mak buat ne'ebé

*Realidade ida de'it:  
online eh offline.  
Tan ne'e mak  
nu'udar edukadór/a la to'o  
de'it atu sai matan moris ba  
risku, ba perigu sira, no  
defende an... presiza halo  
dalan atu kuda kampu, harii,  
edifika, iha liafuan ida:  
siviliza territóriu dijital.*

# FOREVER STRONG

Ryan Little

(USA, 2008, 109 min.)

*Ha'u la buka atu hari'i tim ne'ebé manán,  
maibé foin-sa'e sira ne'ebé manán.  
Foin-sa'e sira ne'ebé forte nafatin  
(Treinadór Larry Gelwix)*

Rick Penning mak foin-sa'e ho talentu boot atu joga, maibé iha problema ho droga no álkol. Bainhira kaer tiha nia no lori ba instituaun formasaun nian iha Salt Lake City nia lakon ninia pozisaun iha klub Arizona Rugby, ne'ebé nia aman rasik mak treinadór. Tanba ninia nakar-teen ida ne'ebé laiha liu dixiplina iha ninia moris, nia envolve iha asidente hodi kauza danu ba ema no tan hatudu katak nia laiha sentidu responsabilidade nian, tribunál haruka nia ba hela iha Institutu ba sira ne'ebé seidauk halo tinan 18, nune'e la bele hatama ba kadeia. Liu husi enkontru ho Mark (responsavel Institutu nian), foin-sa'e ruma no liuliu treinadór tim rugby Highland, Larry Gelwix (protestante, mormon) ninia moris no ninia atitude sira nakfilak nia ba di'ak. Nune'e nia hahú dalan ida ne'ebé hanorin ba nia saida mak loloois importante liu iha moris no, hodi ninia treinadór foun ne'e nia tulun no ninia kolega sira tim nian, nia sai foin-sa'e foun ida ho kapasidade atu lori ba oin ninia tim to'o iha finál kampeonatu nasional, iha ne'ebé sira tenke compete ho Arizona Rugby. Iha film ne'e ho modu partikulár interesante figura Rick nia aman nian, ne'ebé hakarak realiza ninia mehi bainhira foin-sa'e liuhusi nia oan no figura treinadór Larry Gelwix ne'ebé sei sai figura aman loos

nian ne'ebé buka atu tulun Rick hasai ninia kualidade sira ne'ebé di'ak liu no halo nia sai kampeaun loloois ida, la'ós de'it iha kampu jogu nian maibé mós iha moris.

## *Atu reflete ho joven sira*

Iha filme ida ne'e iha buat barak ne'ebé halo ita hanoin ba Don Bosco no ninia estilu edukasaun nian. Ita koko atu kompara:

- Don Bosco ho ninia ambiente ho: Mark no maluk adultu seluk Institutu nian, treinadór no ninia ajudante (iha liafuan ruma ne'ebé sira dehan ka hahalok ruma ne'ebé halo ita ba Don Bosco?)
- Kolega sira tim Highland nian
- Kastigu ne'ebé Rick simu
- Estilu proposta nian

Iha filme ita haree oinsá Rick troka ninia a t i - tude hasoru ema no moris: oinsá nia hatudu mudansa hirak ne'e? Tuir iminia hanoin, saida mak halo nia troka? "Rona" mak atitude ida ne'ebé filme hatudu beibeik: liuhusi buat ne'ebé hakerek iha Institutu, Rick nia inan nia liafuan ba Rick nia aman, to'o estilu Mark no Larry nian. Tuir imi-nia hanoin tansa atitude ida ne'e mak importante? "Maromak la halo buat ida ne'ebé la di'ak" (husi diálogu entre treinadór no Rick atu sai kapitanu): oinsá Larry hatudu ninia fier iha ninia atividade ho foin-sa'e sira ne'ebé joga rugby?

(Comsocial TIN)



**PROTESAUN MENORIDADE**



**AKOMPAÑAMENTU NO ANIMASAUN**



**PROTESAUN BA ITA HOTU NIA UMA**

